

1 Corintios

Ja ua rá mudi rá carta bi 'yo'tra Pablo, ngue bi mennba yø 'yɛc'ɛi Corinto.

1 ¹ Nugä drá Pablo, Oja bi 'yɛxqui ngue drá representantegä rá Jesucristo. Co 'nɛhna mā zi cūhū rá Sóstenes 'bucua, ² dadi zenguagä'be'u to gätho ya o rá 'ye Oja, rá mmup'u ja rá hnini Corinto. Ya yø ja'i'ahū Oja ngue guí ɛc'ɛihū rá Jesucristo. Bi zon'nahū Oja ngue gui hyemhmū p'u rá nts'o. Porque gue'a i ts'ofu gätho yø ja'i ɛc'ɛi rá Jesucristo'a ngue da hyep'u rá nts'o. Ngujū, ngu mi'da yø ja'i, gue'a rá Jesucristo ga øt'e ngue mā Hmūhū. ³ Dí nnegä'be ya ngue nuna Oja mā Papáhu co 'nɛhna mā Hmūhū Jesucristo di jap'ahū 'nɛ da hyut'a ni mmuihū.

⁴ Nugä njandyatho dadi ja mammadi Oja conná ngue'ahū. Porque xandøngu rá njapi Oja bi unni te'o gätho ya guí n'yohū rá Jesucristo. ⁵ A nuyá, ngue ya guí n'yohū rá Jesucristo ya, emmɛi di jap'ahū Oja. Porque xoc'a ni mmuihū Oja, ngue guí pahmū xanho hanja rá hya. 'Nɛ øt'e ngue guí padi ha gdi japrā hya gui xihmū yø ja'i. ⁶ A nuyá, nū te rá hya dá xi'ahū ngue di nja'mø gá 'yɛc'ɛihū rá Cristo, gue'a rá hya bi njap'u guí 'buhmū'a ya. ⁷ Janangue nuyá, mente rá pa guí tømhmū ngue da ep'u mā Hmūhū Jesucristo, ya hinte gadi 'behmū'a rá njapi Oja di uni. ⁸ Di ha'ahū rá ts'edi Oja ngue guí nduhū xandønho asta guep'u rá nzegui. Porque nnepe ngue hin tema hya da din'nahū 'mø rá pa da ep'u mā Hmūhū Jesucristo. ⁹ Nuna mā Hmūhū Jesucristo, rá Ts'unt'u Oja. Bi zonngahū Oja ngue 'dap'u ga n'yohū nā. Nū'a rá hya di yarcāhū Oja ngue di nja, gue'a di nja'a.

¹⁰ Ague mā zi cu'ahū, gue'a mā Hmūhū Jesucristo di 'dacä rá ts'edi ngue dí xi'ahū nā rá hya ja ua. Dí xi'ahū ngue hinga 'da'a n'nanni di n'yo ni hyahū, sinoque 'dap'u di n'yo ni hyahū. I jatho ngue da 'da'igu ni n'yomfɛnihū, da 'da'igu gui 'yøthū. ¹¹ Dí xi'ahū nā rá hya nā mā zi cu'ahū, porque nū'u yø mɛni rá Cloé bi xiqui ngue gadi njunthū. ¹² Porque hinga n'na hyatho guí mmamhmū. I 'bū i'da ni n'yohū ngue ɛna: “Nugä dí tennä rá hya mmanna Pablo”. Mi'da p'uya ɛna: “Nugä dí tennä rá hya mmanna Apolos”. Mi'da p'uya ɛna: “Nugä dí tennä rá hya mmanna Bədu”. Mi'da p'uya ɛna: “Nugä dí tennä rá hya mmanna Cristo”. ¹³ A nuyá, xi'a rá Cristo, ¿ua 'buti'da yø 'yɛc'ɛi ngue n'youi'a? A nugä drá Pablo, ¿ua guí emhmū ngue bi ma mā cuatigä rá pont'i conná ngue'ahū? ¿Uague gá nxixya 'da'ahū ngue gui tenngahū?

¹⁴ Nūgä dadi ja mam̄madi Oja ngue hinjon dá xixya'ah̄u, hinda hōndra Crispo 'nēhra Gayo dá xixyabi. ¹⁵ Janangue hinguī sā gui 'yēmhm̄u ngue dá xixyabi yō ja'i para ngue da dennguī. ¹⁶ Bi zo mā mm̄ui ya ngue ra Estéfan̄as co nē'u 'bup'u ja rá ngu'a, xquet'a dá xixyabi. Hindí padī ngue'mō 'bū hmi'da yō ja'i dá xixyabi, ogue hin'na. ¹⁷ Pē ra Cristo himbi mēnguī ngue ga xixyabi yō ja'i. Sinoque bi mēnguī ngue ra hoga 'da'yo hya ga xihyō ja'i. Nūgä hindí mm̄angä yō hya mahotho ga nt'ode ngue hōntho ga nnepe da 'yēc'eigui yō ja'i te dí mma. Sinoque hōnt'a ja ts'edi ga mma ngue bi du p'u ja ra pont'i ra Cristo, gue'a dí mman'a.

¹⁸ Nūna ra hoga 'da'yo hya na, i hma ngue bi du p'u ja ra pont'i ra Cristo ngue bi yanju. A nu yō ja'i ngue di m'medi, embi ngue hinte di muui na ra hya na. Pē nuju ngue di nyamma tehu, n'youi rá ts'edi Oja na ra hya na. ¹⁹ I mm̄amp'u ja ra Maca Libro ra hya te bi man'Oja ngue ena: “Nu'u yō ja'i ena ngue ja xangu yō mfadi, nūgä ga udi ngue hinte di muui yō hya padī. Nu ra ja'i da 'yēna ngue ra bamhya, di nēqui ngue hinte di muui rá hya padī”, en'Oja. ²⁰ Nūua ja ra ximhäi, i 'būhyō ja'i ena ngue ja yō mfadi. I 'būhyō ja'i ena ngue yō xännbate. I 'būhyō ja'i ena ngue yō mbadi xandōnho, i padī te gä ja nximhäi. Pē nūna Oja i embi ngue hinte di muui yō mfadi ya yō ja'i ya.

²¹ Nūna Oja majuanī ngue jase rá mfadi. Bi zänni ngue nu'a te yō mfadi yō ja'i 'bucua ja ra ximhäi, hinga gue'a ja ngue di fadi te'o Oja'a. Nūna Oja bi zänni ngue nu'u yō ja'i da 'yēc'ei ra hoga 'da'yo hya, gue'u di nyanyō te'u. Nūna ra 'da'yo hya na, embyō ja'i nu'u hinguī ec'ei ra hya, ngue hinte di muui ra hya. ²² Yō judío, i nne ngue 'be da nu yō milagro, ja da 'yēc'ei ra hya. A nu yō ja'i hingyō judío, gue'a te yō mfadi yō ja'i 'bucua ja ra ximhäi di ho da 'yōde. ²³ Pē nūgähe, nūna ra hya ja ts'editho ga mm̄angähe, guehna ngue da sihyō ja'i ngue bi du p'u ja ra pont'i ra Cristo na, ngue di hoga mā ts'oquihu. Hōnt'a dí mm̄angähe'a. Pē yō judío p'uya, i ena ngue ra 'be'isätho 'mō øhna ra hya na. A nu'u yō ja'i hingyō judío p'uya, embi ngue hinte di muui na ra hya na. ²⁴ Pē nuju, ngue ya dí ec'eihu ra Cristo, ngu yō judío, ngu'u hingyō judío, gä bi zonngahu Oja 'nē bi xoga mā n'yomfenihu para ngue ga pahmu ngue ra Cristo haprá ts'edi Oja 'nē haprá mfadi Oja. ²⁵ Nu'a te i du ra Cristo, yō ja'i embi ngue Oja hinguī padī te øt'e. Pē Oja i pase te øt'e. A nu yō ja'i hinguī padī hanja'a te øt'Oja. Porque yō ja'i embi ngue hinguī nzaqui Oja. Pē Oja mathoguitho ga ndōnzaqui ngue'a ga nzaqui yō ja'i.

²⁶ Ague mā zi cu'ah̄u, ya guí nnuhu te gäma ja'i bi zon'na Oja ngue da 'yēc'ei ra Cristo. Zi yohotho bi zo'u yō ja'i t'embī ngue ja yō mfadi, nūya nnu manho yō ja'i ua ja ra ximhäi. Nu'u ja yō cargo ngue nts'ut'abi xquet'a zi yohotho bi zofo. Xquet'a zi yohotho bi zo'u yō ja'i ngue hnuc'ei p'u ja yō hnini. ²⁷ A nuyá, Oja bi huanhyō ja'i nu'u hin'yu yō

mfadi ua ja ra ximhäi para ngue di 'berpabi yø sä'u yø ja'i ena ngue ja yø mfadi. Oja bi huanhyø ja'i nu'u hingui nzaqui yø hya ua ja ra ximhäi para ngue di 'berpabi yø sä'u yø ja'i ena ngue xanzaqui yø hya. ²⁸ Nuna Oja bi huanhyø ja'i nu'u t'embí ngue hinga njuani ua ja ra ximhäi xoque ma hót'e p'u, para ngue da hyejpabi yø hya'u yø ja'i ena ngue ja yø ts'edi. ²⁹ Janangue nup'u ja rá hmi rá dá Oja ya hinjonni ja'i da zäp'u da 'yena ngue di 'yets'i. ³⁰ Nuna Oja, bi 'yót'e ngue ya man'yohu ra Jesucristo ya. Oja bi ne ngue conná nguehra Cristo dá pahmu hanja na rá hya Oja. A nuyá, ngue conná nguehra Cristo, ya bi hoga ma ts'oquihu. 'Ne go øt'a ra Cristo ngue ya dí ohu rá 'ye Oja. Porque go gue'a ra Cristo bi gurca ma ts'oquihu. ³¹ Ja di nequi ua hanja na ra hya nt'ot'i p'u ja ra Maca Libro ngue ena: “Nu to i nne di 'yets'i, pe gue da 'yespabi'a rá Hmu bí 'bu mahets'i, hingue masque go ra ja'i'a di 'yets'i”, i ena.

2 ¹ Ague ma zi cu'ahu, nu'mø ma magä p'u guí 'buhmu ngue dá xi'ahu rá hya Oja, hindá mangä yø hya ga ya yø ja'i ena ngue yø bamhya. Ni xindá mangä yø hya nu'u mahotho da nt'øde. ² Porque nu'mø ya di 'bucä p'u ha guí 'buhmu, hõnda n'na ra hya dá sänni ngue ga xi'ahu. Guehna ra hya na ngue ga mma hanja ngue bi ma ma cuati p'u ja ra pont'i ra Jesucristo. ³ A nu'mø ya di 'bucä p'u ha guí 'buhmu p'uya, gä nuhu ngue hindí ya manzaqui. Sinoque asta dí huaqui, porque dí su ngue hindá bõngmanho ra hya ga mma. ⁴ Nu'mø ma xi'ahu na ra hya na, hindá mangä'u yø hya mahotho da nt'øde ngue ma mfadise, para ngue di thap'a ni mmuihu. Sinoque nuya yø hya dá xi'ahu, guese ra Espíritu Santo i ja rá ts'edi ngue bi xoc'a ni mmuihu para ngue da dinni n'yomfenihu xanho hanja na ra hya na. ⁵ Janangue nuna ni nt'ec'eihu ja ya, guehna Oja jase rá ts'edi bi the na ra hya na. Hinga guep'u ja yø hya yø ja'i nu'u ena ngue yø bamhya bi the na ra hya na.

⁶ Pe nup'u 'buhyø ja'i ngue ya xa nzehyø nt'ec'ei, guehya dí xicä ra hya nu'a majuaní ngue di gohi ngue yø bamhya yø ja'i. Pe nuna ra hya na, hinga guehna ra hya pa'u yø ja'i ena ngue yø bamhya 'bucua ja ra ximhäi yø hya na. Ni xinga gue'a te ra hya pa'u yø ja'i di manda ua ja ra ximhäi yø hya na. Porque nu te ra hya pa'u, da thotho'a. ⁷ A nuna ra hya ngue majuaní di gohi ngue yø bamhya yø ja'i, guehna rá hya Oja dí mmangä na. Nu'mø yø pa xa thogui, nu yø ja'i mi 'bucua ja ra ximhäi himbi badi hanja na ra hya na. Hante ngue di hocra ximhäi Oja, ya xi zänni te 'be'a di njam'mefa ngue ha di njap'u di nyamma tehu. ⁸ Nu'u yø ts'ut'abi ua ja ra ximhäi, hinjombi n'yo yø mmui ngue xta mbadi hanja na ra hya na. Porque nu'mø ngue xta ndinyø mmui yø ja'i hanja na ra

hya na, nuna ma Hmuh Jesucristo magueŋ, ya hinxta mma ma cuati ra pont'i 'mø. ⁹ Bi nja tengutho ra hya mmamp'u ja ra Maca Libro ngue ɛna: “Nuna Oja, ya xa nzänni te da japyø ja'i nu'u di madi. Guehna rá njapi Oja hinjonni ja'i di pøni ngue di padi hanja na. Porque hinjam'mø 'be bi nja'a te mi ja ngue da 'yøt'Oja”. ¹⁰ Pe Oja bá penngahü ra Espíritu Santo, gue'a bi 'yøt'e ngue bi dinma mmuihü hanja na ra hya na. Porque ra Espíritu Santo i padi gätho'a te rá n'yomfëni Oja'a. ¹¹ Nú n'na ra ja'i ya, hinjongui parpi te ja rá n'yomfëni. Hønse ra ja'i pase te mbemp'u ja rá n'yomfëni. Xquet'a njarbutho Oja ya, hinjonni ja'i da zä da badi te ja rá n'yomfëni Oja. Sinoque hønse ra Espíritu Santo i padi xanho te ja rá n'yomfëni Oja. ¹² Janangue nuju, hinga gue'u yø hya yø bamhya 'bucua ja ra ximhäi na ra hya dí pahmu. Oja'a bá penngahü ra Espíritu Santo ngue gda pahmu hanja na rá njapi Oja di 'dacju. ¹³ Janangue nuna ra hya dí mmanya, hinga guehya yø hya ngue ma n'yomfëniŋe dí mma, sinoque ra Espíritu Santo i xännga ra hya dí xihyø ja'i nuya n'youi ra Espíritu Santo.

¹⁴ Pe yø ja'i hingui n'youi ra Espíritu Santo hingui sä da dinyø mmui hanja na ra hya xänngahü ra Espíritu Santo. Embi ngue hingerä bamhya ra ja'i mmanä ra hya na. Hingui padi hanja, porque hingui n'youi ra Espíritu Santo. ¹⁵ A nu yø ja'i n'youi ra Espíritu Santo i sä hacra güenda xandønho hanja na ra hya na. 'Ne hingui sä to da 'yëmbi ngue hinga gue'a te ra hya i mma. ¹⁶ Porque nt'ot'i p'u ja ra Maca Libro ra hya ngue ɛna: “¿Te'o ni ja'i da zä da bapabi rá n'yomfëni'a ma Hmuh? ¿Te'o da 'yëna ngue bi m'mührä xännbate Oja ngue bi xännbä te øt'e?” Pe nuju, ra Espíritu Santo'a dí n'yohu, 'ne gue'a ra Espíritu Santo øt'e ngue dí tihmu zits'u hanja rá n'yomfëni ra Cristo.

3 ¹ Ague ma zi cu'ahu, nu'mø dámba m'mucä p'u guí 'buhmu, nugä hindä xi'ahu yø hya nu'u dí xicä yø 'yëc'ëi ya n'youi ra Espíritu Santo. Sinoque dá xi'ahu ra hya hingui hënni gdi pahmu. Porque guí 'buhmu tengutho yø basi ngue zits'utho tinni mmuihü hanja rá hya ra Cristo. ² Dä xän'nahü yø hya hingui hënni gdi pahmu. Tengutho n'na ra basi 'mø sidra xi'ba, hingerä hme ma t'unni da zi, dá ja'ahu p'u. Porque himbi zä xtä ndinni mmuihü hanja ya yø hya xanhënni. Asta ni xinga guedya di tintho ni mmuihü hanja ra hya ya. ³ Porque tobe guí øthohu tengutho ga 'bu hmi'da yø ja'i. Tobe gyø zeyathohu. Tobe gyø 'yøt'i suithohu. Tobe hinga 'da'igu ra hya guí mmamhmü. Tobe guí øthohu tengutho øtyø ja'i nu'u hingui pa Oja. ⁴ Porque nu 'da'ahu, guí em'mø gui yahü: “Nugä dí tennä ra hya mmanä Pablo”. Mi'da p'uya ɛna: “Nugä dí tennä ra hya mmanä Apolos”. Janangue ja di nequi p'uya ngue guí øthohu tengutho øtyø ja'i 'bucua ja ra ximhäi.

⁵ Nūgä drá Pablo, conna Apolos, ¿teni 'be'a goma ts'edi jagä'be ngue go tenngä'be yø ja'i? A nūgä'be yø mēfithogä'be Oja. Høntho dá øt'ä'be ra 'befi ngue gä 'yēc'ēihū rā Hmū Jesucristo. Pē n'na ngu n'nagä'be, nū'a te rā 'befi bi 'dacä'be Oja, gue'a dí øt'ä'be'a. ⁶ Nūna rā hya dá xi'ahū, tengutho n'na rā hmūdä 'mø bi thūhū, njarbutho na. Nū rā Apolos, go bi xinthe'a. Pē gue'a Oja di tetra hmūdä. ⁷ Janangue nuyá, ngu'a tū rā hmūdä, ngu'a xinthe, hīnjongui tate. Go gue'a Oja i tate, porque go øt'e ngue i te rā hmūdä'a. ⁸ A nū'u tuhra hmūdä, 'nē'u xinthe, 'da'igu yø hya. Pē n'na ngu n'na ya, nū'a te rā 'befi bi 'yøt'e, Oja da gut'i. ⁹ A nūgä'be, yø mēfithogä'be Oja. A nū'ahū, nī mmuihū p'u bi ma nthūhū rā hmūdä, gue'ahū i nnōpa huahī Oja.

I ja man'na rā hya ya. Nūna Oja, tengutho 'mø ngue bi dū'mi bi hyø'a n'na rā ngu p'u guí 'būhmū. ¹⁰ A nūgä p'uya, tengutho n'na rā gado. Nūna Oja bi 'yøt'e ngue dá dū'mä rā 'befi. A nū mī'da yø xānnbate p'uya, tengutho 'mø dadi tetra jado'u. Pē n'na ngu n'na yø gado di sigue rā 'befi, i ja ngue da mādi xāndōnho, hīnha di dūnna ngu. ¹¹ Nūna te rā hya bi ma mā dū'mi ngue bi si'ahū hanja rā Jesucristo, guehna rā hya bi nōpa do p'u ha brā fuhra ngu na. Hīngui sã ngue da ma mā dū'mi rá 'befi Oja mēnte hīngui hma hanja'a rā Jesucristo. ¹² Pē nuyá, xangu yø do i ja ngue di usa'u to di sigue rā 'befi ngue hōnnigu. Nū 'da yø mēfi, da japra do ngue rā oro p'u ja rā ngu. Nū mī'da yø mēfi, da japra do ngue rā t'axi. Mī'da yø mēfi, da japyø do ngue māzihotho gui nēqui. A nū mī'da yø mēfi, yø za da japra ngu. Mī'da yø mēfi, da japyø paxi rā ngu. Mī'da yø mēfi, yø xunza da japra ngu. ¹³ Pē n'na ngu n'na yø mēfi, nū'a te rā 'befi bi hoqui, nū'mø rā pa dani thaxra güenda, ja da fadi xanho p'uya ngue'mø xanho rā 'befi bi hoqui, oque hīn'na. Porque nū'a rā pa'a, rā sibi di nja. Nū'a rā sibi p'uya, ja di nēqui p'u'a te ga nho rā 'befi bi hoqui n'na ngu n'na yø hyōnnigu. ¹⁴ A nū rā hyōnnigu ngue hīndi nzø'a te bi japra ngu, ya da hyanna nzäbi. ¹⁵ Pē nū rā hyōnnigu ngue bi nzø'a te bi japra ngu, ya di m'mē'a te rā 'befi bi hoqui. Hōnse rā hyōnnigu di nyanna te, tengutho 'mø ngue bá pongra ndate n'na rā ja'i p'u ja rā ndate sibi.

¹⁶ ¿Ua hīngui pahmū ngue gätho'ahū, i nnōpa nija Oja hapu 'būhra Espíritu Santo? Porque rā Espíritu Santo ya guí n'yohu'a ya. ¹⁷ Nū'mø ngue to di ts'onnbabi rá nija Oja, Oja di castiga rā ja'i. Porque rá nija Oja xānduxqui'a. Janangue nū rā xānnbate ngue di ts'onnbabi rá 'befi Oja p'u guí 'būhmū, da ma rā castigo.

¹⁸ Hīngui sã ga här'ma mmui, ga ena ngue dí pasehū hanja rā hya. Madague'a en'i'da yø ja'i ngue xangu yø mfadi i ja, pē nuya yø ja'i ya, jatho ngue da 'yøt'e tengutho 'mø ngue hīnte di padi. Ja da dīmp'u xanho rá mmui rā ja'i ha rá nja na rā hya majuanī di nja rá mfadi.

¹⁹ Porque nuya yø ja'i 'bucua ja rā xīmhai, ngue hīngui pa Oja, nup'u ja rá hmī rá dā Oja hīnte di muui yø mfadi ya yø ja'i ya. I mmamp'u ja rā

Maca Libro ra hya ngue ɛna: “Nuna Oja, i ɔt'e ngue nuna ra ja'i ɛna ngue bi dinse rá mmui na ra hya padi, nuna ra hya bi dinna ja'i, hin tema nho da 'yɔrpabi”. ²⁰ I nt'ot'i p'u ja ra Maca Libro man'na ra hya ngue ɛna: “Nu yɔ ja'i ɛna ngue ja yɔ mfadi, pɛ Oja parpabi yɔ n'yomfɛni yɔ ja'i ngue nuya yɔ hya pahyɔ ja'i hinte di muui”. ²¹ Janangue nuyá, nu'u yɔ ja'i guí ɛmhm̃u ngue ja yɔ mfadi ngue yɔ bamhya, 'yo sä guí ɛspah̃u ngue da guehya gui huanhni ndana guí tenhnu ya. Porque gätho yɔ xännbate, gätho'a te ja nximhäi, gätho Oja bá sänni ngue i ja para ngue da 'yɔt'ah̃u ra nho. ²² Nugä drá Pablo, ra Apolos, ra Bedu, dí 'bucähe ngue ga fäxahe. A nuyá, nu te gä bá sän'Oja ngue ja ua ja ra ximhäi, i ja ma teh̃u, i ja ra ndate, nu te gä dí nnuh̃u ngue ja ra pa dí 'buh̃mu ya, da gue'a te ga nnuh̃u ra pa di 'yɛp'u, nu te gätho dí nnuh̃u ya, ga nja yɔ cosa ngue da 'yɔrcah̃u ra nho. ²³ A nuju ya, ma ga ɔrpah̃u rá pähä ra Cristo. Ra Cristo p'uya, i ɔrpabi rá pähä Oja.

4 ¹ A nuyá, dami 'yɔ'ñi güendah̃u ngue yɔ mɛfithogähe ra Cristo. Bá ɛxähe ngue nuna rá hya Oja hingui fadi hanja, ga xännbahe yɔ ja'i hanja na ra hya na. ² Guí pah̃mu ngue n'na ra mɛfi 'mø bi ndäpa n'na ra 'bɛfi, nu'a ra 'bɛfi sifi ngue da 'yɔt'e i ja ts'editho ngue da 'yɔt'e. ³ A nugui, ɛte'o da zä da hyasca ra güenda ngue'mø xanho te dí ɔt'e, ogue hin'na? Dí haxä njuani ngue hinga gue'a ni 'bɛfih̃u'a ngue gui hyascäh̃u ra güenda. 'Nɛ hinjonni ja'i da zä ngue da hyascagui ra güenda ngue'mø gue'a dí ɔt'e ogue hin'na. Ni xinga gueque dí haxa njuani ngue'mø gue'a te dí ɔt'e ogue hin'na. ⁴ Nup'u nná bɛngä'a te dí ɔt'e, dí ɛna ngue ya gue'a te nná 'yo ya. Pɛ hingue masque dí ɛna ngue hin'yu ma ts'oqui. A nuyá, nu'a ja ngue da hyasca ra güenda te dí ɔt'e, guesɛ Oja da hyasca ra güenda. ⁵ A nuyá, 'yo to sä guí haspah̃u ra güenda mɛnte tobe hingui sonna pa da ɛp'u ma Hmuh̃u Jesucristo. Nu'a go da hyaxra güenda'a, ndana ra ja'i xanho te xa 'yɔt'e, ndana ra ja'i hingui ho te xa 'yɔt'e. Nu'a go pa'a te mbɛmp'u ja yɔ n'yomfɛni n'na ngu n'na yɔ ja'i. Nu'a te da dinnbabi Oja n'na ngu n'na yɔ ja'i, gue'a ra njut'i di nja'a.

⁶ Ague ma zi cu'ah̃u, ya dá xi'ah̃u ya yɔ hya dá hyɛqui ngue ra 'bɛfi dí ɔt'e, da guehra 'bɛfi ɔtra Apolos. Nguna ra hya dá xi'ah̃u, n'namhma ngue guí pah̃mu ngue nu'a te mmamp'u ja ra Maca Libro, 'yo gui festhoh̃u. Porque gätho di muui yɔ xännbate, hingui ho gui 'yɛspah̃u 'da yɔ xännbate, xingui 'yɛmhm̃u ngue hinte di muui mi'da yɔ xännbate. ⁷ Xiya, ɛte'o bi xi'ah̃u ya ngue man'na tate xanho'ah̃u ngue mi'da yɔ ja'i? ɛNdana ra hya guí timhm̃u ya ngue hinda gue'a Oja bi 'da'ah̃u ra hya ya? A nuyá, xi'mø ngue Oja bi 'yɔt'e ngue gá pah̃mu ra hya guí pah̃mu ya, ɛhanja ngue gadi 'yɛxh̃u co nu'a te ra hya guí pah̃mu ya 'mø, ɛntho xɔga xäseh̃u ra hya p'u gni bɛmhm̃u ya?

⁸ Nup'u gni bēmhmū ya, ngue ya gá pahmū hanja na ra hya na, guí ena ngue ya hĩnte gadi 'bēhmū ya. Guí 'bū mmanhohū p'u gni bēmhmū ya, entho guí ndast'abihū p'u ga mbøn'a te guí øthū ya. Nugähe p'uya, guí enje n'na nguadi tengutho 'mø ngue hĩnte dadi mugähe. Nuhma 'mø majuanĩ ngue gdi ndast'abi, gadi mandahu ndap'u bi zä. 'Nēcähe dí jats'u mā cargogähe 'mø ngue'a te ra 'befi gdi pehmū. ⁹ Nup'u ga mbøn'a te t'ørcähe ngue yø representantegähe ra Cristo, ena gue xøgue ga 'yøt'a Oja'a ngue ga m'mefathogähe. Dí 'bucähe tengutho 'mø ngue yø ofädi xa ts'ännbi ngue da tho, di njagähe p'u. Di mpeti yø ja'i ngue da nu te ga thohme. Ngu yø anxε, ngu yø ja'i da nutho te ga thohme. ¹⁰ A nugähe, i t'enje ngue dyø 'yammūigähe ngue rá hya ra Cristo dí mmamhme. Pe nu'ahū p'uya, nup'u gni bēmhmū, nu'a rá hya ra Cristo ya guí tĩsehū xandønho hanja ra hya. Pe nugähe dí engähe ngue hĩndi ya manzaquigähe. A nu'ahū p'uya, guí emhmū ngue xanzaqui te guí mmamhmū. Mente thenngähe yø ja'i, a nu'ahū p'uya i hnu mansu'ahū. ¹¹ Nu'mø yø pa xathogui, xtá sähe ra n'u ngue hĩn'yu te ga sihe. Asta guehya, dí sähe ra n'u ra thuhū. Ja'mø dí tũthegähe, oque hĩn'yu te ga hegähe. Ja'mø di unje yø ja'i ngue pegbahe. Ni xingra ngu di ja ngue hapu ga m'muhme. ¹² Dadi n'uni dadi mpefi conma 'yehe. I sanje yø ja'i, pe nugähe p'uya dí äpähe Oja ngue di japi te'o sanje. I mbengahe xan'u yø ja'i, pe dí setähe. ¹³ I nnø man'uje p'u ha ya yø ja'i. Pe nugähe dí thammanhotho gähe. I nnu häigähe yø ja'i, enje p'u tengutho 'mø ngue n'na ra cosa ya xa hørbu yø ja'i, ya hĩnte di muui. Nguna bi 'yørcahe yø ja'i, asta guetya njarbutho.

¹⁴ Nuna ra hya dá cuatä ua ja ra súcua ja ua, hĩndä cuatä na ra hya na ngue gadi 'bet'a ni sähū. Sinoque dadi 'da'ahū n'na ra consejo tengutho 'mø ngue mā basi'ahū. ¹⁵ Madague'a guí 'yena ngue di 'bū'i 'det'a mahuahĩ ni xännbatehū ngue di xän'nahū hanja rá hya ra Cristo, pe nugä go ni papágahū. Porque go rá mudi dá xän'nahū ra hoga 'da'yo hya, janangue bi njap'u ngue guí εc'εihū ra Cristo ya. ¹⁶ A nuyá, ya gá nuhū te dá øt'a p'u guí 'būhmū, gue'a dí xi'ahū guí 'yøthū'a ya.

¹⁷ Janangue dí øt'a p'u na ra Timoteo ngue da xi'ahū te ja ngue gdi n'yohū. Nuná, dadi madi tengutho 'mø ngue mā ts'unt'u, porque dí padi ngue εc'εi xanho ra Jesucristo. Nu'a te nná 'yogä ya ngue dí tennä ra Jesucristo, go da xi'ahū hanja na. Tengutho ra hya dí xännba yø 'yεc'εi di mpeti ndap'u bi zä, da ngut'atho da xi'ahū naya.

¹⁸ Nu'u ni xännbatehū p'u ha guí 'būhmū, i 'bup'u 'da ngue di 'yets'i, ena ngue yø bamhya. Nup'u ga mbēni, ena ngue ga su ga mmagäp'u ngue ga ma nyahū. ¹⁹ Pe da ne Oja ngue ya hĩnda ya'atho ga mmagä p'u ga ma nyahū. Ga nnugä p'uya tegue ngu da 'yøt'u di 'yexpu guí 'būhmū. Ya ga nnugä 'mø ngue majuanĩ øt'a te ra hya i mma, hĩngra hyatho i mma. ²⁰ Porque nu'u yø ja'i ngue ørpabi rá 'befi Oja, hĩngra hyatho mman'u, sinoque ha ra ts'edi ngue øt'a te ra hya i mma. ²¹ Xiya, indana

guí nne gui 'yøthü ya? Guí nne gui sigue te guí øthü para ngue ga sü'ahü 'mø dá magä p'ü, ¿uague guí nne gui n'yo manhohü para ngue mahotho gda zo'ahü 'mø dá magä p'ü?

5 ¹ A nuyá, ndap'ü bi zä i hma te 'be'a bi 'yøt'a n'na ma cühü p'ü ha guí 'bühmü, ngue ya 'bühmü rá hømme. Nuna rá ts'oqui ná p'üya, guehna Tate xants'o, conque guí nuhü ngue nu'ü yø ja'i hinguí pa Oja, hinguí øt'e tengu ná rá hya ná. ² 'Né tobe gadi 'yexpü gui yahü ngue guí ena ya gä gue'a te guí øthü. A nuyá, ngue nguna rá hya bi nja, i jatho ngue guí m'mü ndümmühü. A nuna rá n'yohü bi 'yø'na rá ts'oqui ná, dami hyømhmü thi p'ü ha gadi mpetihü ná. ³ Madague'a ngue hindí 'bücä p'ü ha guí 'bühmü, pé nu'mø dá ben'ahü entho ya xti 'bücä p'ü ngue ga haspa rá güenda ná rá n'yohü bi 'yøtra ts'oqui. ⁴ A nuyá, dami mpetihü ya, dami 'yøthü'a te nnu manho ma Hmühü Jesucristo. Nup'ü ha guí mpetihü, gui 'yø'ni güendahü ngue dí 'bücä p'ü. Da gue'a ma Hmühü Jesucristo guí pahmü ngue di m'müp'ü'a ngue da xän'nahü'a te ja ngue gui 'yøthü. ⁵ Nu'a rá n'yohü bi 'yøtra ts'oqui, dami hyømhmü thi p'ü guí 'bühmü, di map'ü 'bühüø ja'i di manda rá zithü, ja da säp'ü rá n'ü rá do'yo. Xamhmatho ngue di nyanna te 'mø rá pa da ep'ü rá Hmu Jesús.

⁶ Nu'a te rá hya guí øthü, ya hinguí sä nimantho sä gui 'yets'i ngue gui 'yena gä gue'a te gni 'yohü. ¿Ua hinguí pahmü ngue co zits'ü rá íxi, di ixqui gä rá jüni? ⁷ Janangue nuyá, dami hyømhmü thi'a rá n'yohü bi 'yøtra ts'oqui ya, n'namhma ngue hindí ts'om mi'da yø ja'i. Porque tobe hindí nts'onýø n'yomfeni yø ja'i ya. Rá Cristo ya bi tho ngue bi hoga ma ts'oquihü, bi gohi tengutho rá 'bøt'e ja'mø rá ngo ngue rá Pascua. ⁸ Janangue jatho ngue majuaní gui hyehmü p'ü rá nts'o, gätho da gue'a rá nho gdi n'yohü.

⁹ Nu'a rá carta dá pen'nahü m'met'o, dá xi'ahü te ja ngue gui 'yøthü, ngue 'yo gadi nuansü'ü yø 'yots'om'mäi. ¹⁰ Pé nugä hindí en'ahü ngue ya hinguí sä gui ntøthü'ü yø 'yots'om'mäi 'bücua ja rá ximhäi. Ogue ya hinguí sä gui ntøthü yø ja'i høndyø menyu di xandi, ogue yø bë, ogue thanne yø dahmu. Nu'mø ngue da gue'a gdi xi'ahü'a, ya nnetho ngue gui pømhmü ua ja rá ximhäi 'mø. Pé nja ngue hinga gue'a dí mmangä'a.

¹¹ A nuna rá hya dá ne ga xi'ahü ya, 'yo nimantho gadi nsixui'ü sä ena ngue gadi ncühü, 'né yø 'yots'om'mäi, ogue høndyø menyu di xandi, ogue thanne yø dahmu, ogue yø fehni, ogue yø iti, ogue yø bë. Nuyá, guehya ni xinga gue'a di sä ngue 'dap'ü guí nsimhmehü ya. ¹²⁻¹³ Porque nu'ü yø ja'i hinga n'yohü, hingo di tocauí ga haspa rá güenda. Guese Oja da hyaspa rá güenda ya dí xi'ahü. Pé nup'ü ha gadi mpetihü, dami hyaxhü rá güenda te ga 'yo yø 'yec'ei. Janangue nugä dí xi'ahü ngue nuna rá n'yohü bi 'yøtra ts'oqui, dami hyømhmü thi ná.

6 ¹ A nuyá, nu'mø 'buhyø 'yēc'ei ja ngue di yaprá mmi'yēc'eiui, 'yo di thop'u 'buhra ts'ut'abi hīngra 'yēc'ei. Da zä di map'u 'buyø mmi'yēc'eiui, da xifi ngue di hojpi tema hya hēmbi. ² ¿Ua hīnguí pahmu ngue nu'u yø ja'i Oja, gue'u da hyaspa ra güenda yø ja'i 'bucua ja ra ximhäi'u? Xi'mø ja ngue ga haspahu ra güenda yø ja'i 'bucua ja ra ximhäi, xi ra asunto zits'utho guí hēmphu, ¿ua hīnda zä guí xihni mmi'yēc'eiui ngue di hoqui? ³ Conque asta yø anxø Oja ga haspahu ra güenda. Janāngue goma gue'a n'na ra asunto zits'utho di hēmsehū ngue hīnda zä ga hocju. ⁴ Xi'mø hīnguí padī ha gdi hocju n'na ra asunto 'mø guí hēmphu, ¿ua sä ngue gue'u yø ja'i hīngyø 'yēc'ei di hoc'a nī asuntōhū 'mø? ⁵ Dí xi'ahū nā ra hya nā n'namhma ngue guí pēs'nī sāhū. Xip'u ha guí 'buhmu, ¿ua xīnga n'na nc'ei nī n'yohū ngue di padī di hoc'a n'na ra asunto 'mø ja te hēmbyø cu? ⁶ ¿Hanja ngue nup'u 'buhra ts'ut'abi hīngra 'yēc'ei, ja nī map'u yø 'yēc'ei ngue di yaprá mmi'yēc'eiui?

⁷ A nuyá, nu'a te ra njunt'i guí øthū, ja di nēqui p'uya ngue gadi 'behmu ra hya. ¿Hanja ngue nu'mø hīnga gue'a t'øt'ahū, hīnguí hāt'i guí sethū? ¿Hanja ngue hīn gadi n'unī da fē'ahū, xøgue madi zits'u te guí nne gui 'behmu? ⁸ Conque xquet'a guí njahū p'u ngue hīnguí ho te guí øthū, asta nī mmi'yēc'eiui guí pēhū.

⁹ 'Yo gyø thätihū. Guí pahmu ngue nu'u yø ja'i xants'o te øt'e, hīnda yurbū ha di manda Oja'u. Hīnda yurbū yø 'yots'om'mäi. Hīnda yurbū ya yø n'yohū ørpe tengutho 'mø dra xisu yø mmin'yohūui. Hīnda yurbū ya yø ja'i thanne yø dahmu. ¹⁰ Hīnda yurbū yø bē. Hīnda yurbū ya yø ja'i hōntho i nne ngue di xandi te pets'i. Hīnda yurbū yø iti. Hīnda yurbū yø zate. Hīnda yurbū'u corpa ra 'yu yø mmic'eiui ngue pē. ¹¹ Nuyā yø hya dí xi'ahū ya, ya xcá njap'u 'da'ahū ya. Pē nuyá, ya bi ma mahojpi'ahū. Ya yø ja'i'ahū Oja ya, ngue gā 'yēc'eiui'a ra Hmu Jesús. Ya guí n'yohū ra Espiritu Santo bá pēn'nahū Oja ya.

¹² Ya hīndi mandagahū ra ley ga 'yo yø judío ya. Ya sä ga øthū te dí nnehū ya. Pē ma ga samma mmuihū ngue hīnga øthū'a te hīnni 'yup'u ga øthū. ¹³ Majuani'a te ra hya i hma ngue nu te si ra ja'i, rá mmui nī ma. A nu rá mmui ra ja'i p'uya, ga nja'a ngue ja da mēspu'a te si. Pē nuyā yoho yø hya ya, Oja da 'yøt'e ngue di njap'u rá nzequi ya. Pē hīnguí sä ga emhmū ngue ga nja mā do'yohū ngue ra 'yots'om'mäi. Sinoque rá do'yo ra ja'i, ga nja nā para ngue da 'yørpabi rá 'befi ra Hmu. A nu'a ra Hmu p'uya, di hatra ts'edi mā do'yohū. ¹⁴ Nūna Oja bi japi ngue bi bēnnate ra Hmu Jesucristo p'u ha bi t'ägui. Xquet'a di jaju p'uya, ja rá ts'edi ngue da 'yøt'e ngue ga bēnnatehū.

¹⁵ ¿Ua hinguí pahmu ngue nu ma do'yohu, i nnøpe ngue rá do'yo ra Cristo? ¿Ua da zä ga hajpahu n'na parte rá do'yo ra Cristo ngue di mpenhui rá do'yo n'na ra xisu ngue ra 'yots'om'mäi? Nu'a, hinguí sä'a.

¹⁶ Guí pahmu ngue n'na ra n'yohu 'mø bi me n'na ra xisu ngue ra 'yots'om'mäi, nuya yo nc'ei ya, entho n'na nc'eitho, porque n'nat'a ra te comhmi. I nt'ot'i p'u ja ra Maca Libro ra hya ngue ena: "Nu'u yo nc'ei di mpenhui, i cohi ngue n'nat'a yø do'yo, porque i comnda ra te". ¹⁷ A nuyá, nu ra ja'i di mpenhui ra Hmu Jesús, i cohi tengutho 'mø n'na nc'eitho.

¹⁸ 'Yo gui 'yots'om'mäih. I ja xangu mi'da yø ts'oqui øtyø ja'i, pe nu ra ja'i ngue 'yots'om'mäi, rá do'yose di ts'oni. ¹⁹ ¿Ua hinguí pahmu ngue nu ma do'yohu, gue'a nnøpa nija ra Espíritu Santo'a? Porque Oja bá penhna Espíritu Santo ngue di m'mup'u ja ma mmuihu. A nuyá, ya hin dadí mmandashu ya. ²⁰ Porque ya dí ohu rá 'ye Oja ya ngue bi gurca ma ts'oquihu. Janangue nuyá, jatho ngue ga ørpahu rá pähä Oja conma do'yohu 'ne conma n'yomfënihu. Porque ya rá mmetigahu Oja.

7 ¹ Nuna man'na ra hya guí ännghu ya, dí nne ga xi'ahu hanja. Nu ra ja'i ngue hinguí nne di nthati, ya xanho ngue'mø hindi nthati. ² Pe i fadi ngue ndap'u bi zä emmei 'yots'om'mäi yø ja'i. Janangue man'na xanho ngue ra n'yohu di m'muhrá xisu. Ra xisu p'uya, di m'muhrá ndø. ³ Nu ra n'yohu i jatho ngue di m'muhmi xanho rá xisu. Ximmangu ra xisu, i jatho ngue di m'muhmi xanho rá ndø. ⁴ Nu ra xisu ngue ya o rá 'ye rá ndø, da 'yørpabi rá pähä rá ndø. A nu ra n'yohu ngue ya o rá 'ye rá xisu, da 'yørpabi rá pähä rá xisu. ⁵ Nu'mø ja rá pähä ra n'yohu, 'yo di enna xisu ngue hinda zä. Nu'mø ja rá pähä ra xisu, 'yo di enna n'yohu ngue hinda zä. A nu'mø ja ngue da 'yøtyø mhmat'Oja, man'na xanho da gohra cohi ngue hinda dährá xisu ra n'yohu njammi pa. M'mefa p'uya, ya di siguetho tengutho m'met'o. A nu'mø hindi siguetho tengutho m'met'o, nu'a hindi hyäti da zamyø mmui, ra zithu p'uya da japi ngue da 'yøtra ts'oqui n'nanni.

⁶ Nuna ra hya ja ua dí xi'ahu, hontho dí xi'ahu ngue da zä di nthatra ja'i. Pe nugä hin dadí mandagä ngue xøgue di ja ts'editho di nthatra ja'i.

⁷ Dí ensegä ngue xanho 'mø ngue gätho'ahu gui 'yøthu tengutho dí øt'ä ngue hin dadí nthati. Pe nuna Oja, Gä go bi sännbi n'na ngu n'na yø ja'i te da zä da 'yøt'e. 'Buhyø ja'i ngue di nthati, 'buhyø ja'i hindi nthati.

⁸ Nugä dí xihyø ja'i nu'u tobe hindi nthati, da guehyø 'danxu, nu to hindi nthati tengutho dí øt'ä ngue hin dadí nthati, ya xanho. ⁹ Pe nu ra ja'i ena ngue hinda zä di m'muse, man'na xanho ngue di nthati, hinda gue'a ngue ja di undrá mmui ngue hindi nthati.

¹⁰ Nugä dí xihyø ja'i ngue ya xa nthati, nu ra xisu ya 'bührá ndø, 'yo di hep'u rá ndø. Nuna ra hya dí xi'ahu, hingma hyasegä na, sinoque gue'a

ra Hmu rá hya na te dí xi'ahú ngue gui 'yøthú. ¹¹ Pe nu'mø ya bi hyep'u rá ndø n'na ra xisu, ra xisu 'yo dadi nthati mahøn'a, oque man'na xanho da me rá ndø mahøn'a. Ximmangu ra n'yohu p'uya, hinguí ja ngue da hyep'u rá xisu.

¹² I ja man'na ra hya dí nne ga xi'ahú, pe ja dí nne ga xi'ahú na ra hya naya, himbi man'a m'met'o'a ra Hmu na ra hya na. A nu ma cuhu ngue ra n'yohu, nu'mø hinga 'yec'ei rá xisu, nu'mø nnu manho ra xisu ngue di sigue di m'muhmi rá ndø, ra n'yohu 'yo di hep'u rá xisu. ¹³ A nu'mø ngue ra xisu, hinga 'yec'ei rá ndø, 'ne'mø nnu manho ra n'yohu ngue di sigue di mmuhmi rá xisu, ra xisu 'yo di hep'u rá ndø. ¹⁴ Porque ra n'yohu ngue hinga 'yec'ei di tocabi rá njapi Oja di t'unna xisu ngue ra 'yec'ei. Da guehra xisu ngue hinga 'yec'ei, di nthui rá njapi Oja di t'unna n'yohu ngue ra 'yec'ei. A nu'mø ngue hønse ra 'yec'ei di nthui rá njapi Oja, nu yø basi p'uya, ya hin'na'u. Pe ya fadi ngue xuet'a 'nēhyø basi di nthui rá njapi Oja di t'unna papá oque rá mamá ngue rá 'yec'ei. ¹⁵ Pe nu'mø ra n'yohu oque ra xisu ngue hinga 'yec'ei da ne ngue da hyep'u ra 'yec'ei 'buhmi, ya da zä da hyep'u. Porque ra 'yec'ei hinguí sä da 'yørpa ra ts'edi di m'muhmi 'mø hinguí nne. Porque bi zonngahu Oja ngue ga m'mu mmanhohu, hin tema sui di nja. ¹⁶ A nuyá, ngu yø n'yohu, ngu yø xisu ngue yø 'yec'ei, nu'mø 'buhmi yø ja'i hingyø 'yec'ei, xamhmatho da zä ha di japi di nyanná te ra ja'i hinga 'yec'ei.

¹⁷ Nuna Oja, bá sänni te nná 'buhmu n'na ngu n'naju. Nu te di jahu 'mø mamba zonngahu Oja, ya gue'a ga siguethohu'a. Ndap'u bi zä yø hnini hapu di mpeti yø 'yec'ei, guehna ra hya dí xicä yø ja'i naya. ¹⁸ Nu ra ja'i bi zon'na Oja ngue da 'yec'ei, 'ne ya n'yoi ra hmēpya ngue ra circuncisión, 'yo sä di tu rá mmui ngue ya mhmepya. A nu ra ja'i bi zon'na Oja ngue da 'yec'ei, 'ne hinmani njapra hmēpya, 'yo sä dadi ja ndummui ngue di njapra hmēpya. ¹⁹ Porque ya hinguí ja ts'edi'a ya ngue di njapra hmēpya yø ja'i, oque hin'na. A nu'a ja ts'editho ngue da 'yøtyø ja'i ya, ma datho ja ts'edi ngue da 'yørpabi rá pähä Oja. ²⁰ N'na ngu n'na yø ja'i, nu te mi ja 'mø mi zon'na Oja ngue bi 'yec'ei ra Jesucristo, ya di nja tengutho ja ra ja'i. ²¹ A nu'mø ngue grá hmiqúi 'mø mamba zo'i Oja, 'yo sä di tu ni mmui ngue grá hmiqúi. Pe nu'mø ngue da zä ha gdi japi ngue gui pømp'u 'buhni hmu, dami hyoni ha i japi. ²² Pe nu ra ja'i mará hmiqúi 'ne ya ra 'yec'ei ya, da badi ngue nup'u ja rá hmi rá dä Oja, ya rá n'yoi ra Cristo. A nu ra ja'i ngue manjo'o rá hmu, 'ne ya ra 'yec'ei ya, da badi ngue nup'u ja rá hmi rá dä Oja, ya rá mēfi ra Cristo. ²³ A nuyá, ya dí ohu rá 'ye ra Cristo nu'a bi gurca ma ts'oquihu ya. Ya hingrá ja'itho ma hmu ya. ²⁴ A nuyá ma zi cu'ahu, nu'a te ra 'befi mi pehyø ja'i 'mø mi zon'na Oja, di siguehmaha yø 'befi yø ja'i. Porque ndap'u bi zä 'buhyø ja'i ngue ec'ei Oja ya, pe ya gä yø n'yoi Oja.

²⁵ A nuyá, nu'u yø ja'i ngue tobe hĩndi nthati, nu'a ra Hmu hin tema hya bi ma ngue ha di njapi. Pe nugã ga xi'ahu na te ra hya dí mbeni ga mma. Pe dami 'yɛc'eihu te ga mma, porque conná mate Oja ja ts'edi na te ra hya dí mma. ²⁶ Nup'u nnã bengã, xanho ngue hĩndi nthata n'na ra n'yohu. Porque yø pa dí 'buhmu, ya xanhennitho 'mø ngue 'buhrá xisu ra n'yohu. ²⁷ A nu ra n'yohu ngue ya 'buhrá xisu, 'yo sã di sãnni da hyep'u. Pe nu ra n'yohu ngue hĩjo'o rá xisu, man'na xanho 'yo di honná xisu. ²⁸ Nu'mø bi nthatra n'yohu, hĩngrá ts'oqui bi 'yøt'e. Nu ra hmute 'mø bi nthati, ngutho hĩngrá ts'oqui bi 'yøt'e. Nja ngue nu'u yø ja'i di nthati, hĩndi 'bedi tema hya hembĩ, hĩnga ngu'mø ngue hĩndi nthati. Dí mmangã na ra hya na ngue hĩndi nnegã ngue gui thohmu'a ra dummui tho'u yø ja'i ya xa nthati.

²⁹ Ague ma zi cu'ahu, nu'a ga mbønna ra hya dí xi'ahu ya, ya mits'u dyø pa jap'u. Janangue jatho ngue gui 'yørpahu rá 'befi Oja. Ya hĩnga mbongui ra ora ga m'mumma pãhãthohu p'u ja ma ngumhmu ya. ³⁰ Nu yø ja'i ngue 'bu ndummui, ya hĩnga mbongui ra ora 'be di nzoni. Nu yø ja'i 'bumma pãhã, ya hĩnga mbongui ra ora 'be di nthede. Nu yø ja'i ja te nne da dãi, ya hĩnga mbongui ra ora da dãi te honi. ³¹ Mente ngue dí 'buhmu ua ja ra ximhã, ya hĩndi ma ma mmuihu'a te dí peshu ua. Porque nuna ra ximhã ja ua dí 'buhmu, ya ni ma da guadi.

³² Dí nnegã ngue hĩnte man'na ni hya di ma ni mmuihu. Nu ra n'yohu hĩndi nthati, guehna ra n'yohu di ja ndummui ørpabi rá 'befi ra Cristo para ngue da nu manho ra Cristo te øt'e. ³³ Pe nu ra n'yohu ya xa nthati, gue'u yø cosa honyø ja'i ua ja ra ximhã ni ma rá mmui ngue honi. Porque nne da nu manho rá xisu. ³⁴ Ximmangu yø xisu, xquet'a njarbutho. Nu ra hmute hĩndi nthati, i ho rá mmui ngue ørpabi rá 'befi ra Cristo. Ngu rá do'yo, ngu rá 'nyomfeni, gã xa dãp'a Oja ngue ørpabi rá 'befi. Pe nu ra hmute ngue ya xa nthati, i ho rá mmui ngue da 'yøt'a te ra 'befi ja ua ja ra ximhã, porque i nne ngue da nu manho rá ndø.

³⁵ Nuna ra hya dí xi'ahu ya, hontho dí nnegã ngue ga fãxahu. Porque hĩndi nnegã ngue guí m'mu mman'uhu. Sinoque dí nnegã ngue guí m'mu mmanhohu, gui hyo ni mmui ngue gui 'yørpahu rá 'befi ra Cristo.

³⁶ A nuyá, dí nne ga xi'a n'na ra hya ya yø n'yohu si yø t'ixu, 'nɛ ya sonyø pa ngue di nthati. Nu'mø enna n'yohu p'uya ngue hĩngui ho ngue da thohrá nthati rá t'ixu, da zã di tharpi. Porque ra nthati, hĩngra ts'oqui'a. ³⁷ A nu ra n'yohu ngue n'nat'a mbeni ngue hĩndi tharpabi rá t'ixu, da 'yemp'u ja rá mmui ngue hĩngui ja ts'edi ngue di nthatrá t'ixu, ya xanho te øt'e. ³⁸ Nu'a di tharpabi rá t'ixu, ya xanho te øt'e. A nu'a hĩndi tharpabi rá t'ixu, man'natho xanho te øt'e.

³⁹ A nu ra xisu 'mø ngue bi nthati, ya hĩnyu ra nt'edi ngue hõndi nthatui man'na ra n'yohu mente ra pa ngue 'butrá ndø. Pe nu'mø ya bi

du rá ndø, ya da zä di nthati mahøn'a. Hønt'o bi zä da ne da me, gue go drä 'yēc'ei'a rá n'yohu da me. ⁴⁰ Pē nu rá 'danxu ngue'mø ya hinni mantho di nthati, man'na xanho. Guehna rá hya dí mbengä naya, pē dí padi ngue rá Espíritu Santo'a di bēnguī te dí mma.

8 ¹ A nuna man'na rá hya guí ännghu ngue'mø da zä guí sahu rá ngø i tho ngue 'bøspabi yø dahmu, ogue hinda zä guí sahu. Majuani ngue nuju dí pahmu ngue nu'a rá ngø 'bøspabi rá dahmu, hinda ts'onnga ma mmuihu 'mø ngue ga sahu. Pē hinguī ho 'mø ga ena ngue dí pasehu xanho hanja rá hya ngue mi'da ma mmic'eihi. A nuju, jatho ngue ga mmahmu n'na ngu n'naju para ngue man'na di zajma nt'ēc'eihi. ² A nu rá ja'i ena ngue ya bi dini xanho hanja rá hya, pē di 'betho da dini xanho ha exa nja rá hya nu'a ja ngue da badi. ³ Pē nu rá ja'i di má Oja, Oja i nnu manho rá ja'i.

⁴ A nuyá, ma ga xi'ahu xanho hanja'a rá ngø i tho ngue 'børpabi yø dahmu ya. Dí pahmu xanho ngue nu yø dahmu 'bucua ja rá ximhäi, hinde di muui, porque n'natho Oja i 'bui. ⁵ A nu yø ja'i embi ngue xangu yø Oja i 'bui, ngup'u mahets'i, ngu ua ja rá häi. Madague'a enyø ja'i ngue xangu yø dahmu 'bui, 'nē xangu yø hmu, ⁶ pē para ngue nuju, n'natho'a má Ojahu 'bui, gue'a má Papáhu'a. Nuná, guehna Oja bi hoqui te gä dí nnuhu ngue ja naya. A nuju p'uya, dí buhm para ngue ga ørpahu rá pähä Oja. A nuna di nnøpe ngue má Hmuhu ya, guehna rá Jesucristo ná. Conná guehna ya, i ja dyø cosa dí nnuhu ngue ja ya, 'nē guehna di 'dacju má tehu ná.

⁷ Pē hinga gätho má cuhu tini xanho yø mmui hanja ná rá hya naya. Ya xa nzanyø ja'i ngue mi thanne yø dahmu. Janangue nuya yø ja'i hinguī nzaqui yø nt'ēc'ei ya, nup'u ga mbeni, i ena ngue rá ts'oqui ør'mø bi za rá ngø nu'a tho ngue t'ørpa rá 'bøt'e yø dahmu. ⁸ A nuyá, nuna Oja, hinde da jacju ngue'mø ga sihu ogue hinga sihu'u yø cosa'u. Pē nu'mø ga sihu, hinga sä ga emhm ngue man'na xanho te dí øthu. Nu'mø hinga sihu, ngutho hinga sä ga emhm ngue hinguī ho te dí øthu.

⁹ Madague'a sä ngue ga sihu'a rá ngø'a, pē dami mfähmu xanho ngue te guí sihu. 'Yo guí nne ngue nu te guí sihu, go guí ndupatehu p'u da 'yøtra ts'oqui'u má cuhu hinguī nzaqui yø nt'ēc'ei. ¹⁰ Xi'mø da nu ni cuhu ngue guí sihmē p'u ja n'na rá ngunja 'buhyø dahmu. A nu'ahu p'uya, ya guí pahmu ngue hinde ja ngue gui sihu'a te ts'i p'u. Pē nu ni cu, ngue hinguī nzaqui rá nt'ēc'ei, da 'yøtra ts'edi da zi'a te xa 'børpa yø dahmu. ¹¹ A nu'ahu guí pahmu ngue da zä gui sihu'a te gä ts'i p'u. Pē nu ni cu, ngue hinguī nzaqui rá nt'ēc'ei, da 'yøt'e tengue guí øt'e. Gue'a di m'mē'a p'uya ngue ena ngue rá ts'oqui bi 'yøt'e ngue bi zi'a te ts'i p'u 'buhyø dahmu. Conque guí nnuhu ngue gue'a i du rá Cristo'a ngue bi

yani. ¹² Janangue nu to ndupate p'u øtra ts'oqui rá cu, gue'a rá ts'oqui øt'a, ngue festho'a te rá hya mmanna Cristo. ¹³ A nugä, nu'mø ngue gue'a rá ngø dí si ngue ga 'yøtra ts'oqui ma cu, ya hinguí ja ngue ga si rá ngø. Porque hĩndĩ nne ngue ga japi da 'yøtra ts'oqui ma cu co nu'a te dí si.

9 ¹ A nugä, rá representategä rá Cristo, hinga to bi zä ni ja'itho di mandaqui ya. Nuna rá Hmu Jesús, dá nyasegä'be na. A nuna te rá 'befi bi 'dacra Hmu, di nequi ngue bi bømmanho, porque go dá ja'ahũ gá 'yēc'eibahũ rá hya. ² Madague'a 'bũ i'da engui ngue hinga guecä rá representategä rá Cristo, pē nu'ahũ guí pahmũ xanho ngue guecä rá representategä'a. A nuyá, ngue ya guí ēc'eihũ rá Cristo ya, ja guí haxhũ p'u majuanĩ ngue go rá representategä na.

³ Nu'mø te'o ena ngue hinguí nnu manho te dí øt'e, guehna rá hya dí xihna ya. ⁴ Nuna te rá 'befi dí øt'e, ni 'yup'u di n'nacra hmē dí si. ⁵ 'Nē xquet'a ja grā nt'ēdi ngue ga nthati, ga mmē'be n'na rá xisu ngue dra 'yēc'ēi n'namhma ngue ga mmē'be p'u gdá ma. Porque gue'a øt'u mi'da yø representante'a ngue sixtyø xisu. Tengutho øtyø n'yohũ rá Hmu Jesús, ximmangu rá Bedu xquet'a njarbũ. ⁶ ¿Ua guí emhmũ ngue nugä ya, 'nehra Bernabé, høngthogä'be jatho ngue ga taha te ga si'be mēte ga mmangä'be rá hoga 'da'yo hya? ⁷ Xi n'na rá soldado, ¿ua hinguí tahrá nzäbi ngue'a te rá 'befi øt'e, ua n'nanni bi tahrā mēnyu ngue rá gasto p'u ha 'yo? Xi n'na rá n'yohũ ngue'mø bi 'yøt'a n'na rá nuandät'ä ngue yø uva, ¿ua hinguí si'a te pømp'u ja rá 'befi? Xi n'na rá n'yohũ ngue fähyø de'yo, ¿ua hinguí si rá leche 'mø bi de'mi?

⁸ 'Yo guí emhmũ ngue mā hyase na rá hya dí mmangä ya. Porque nuna rá hya na, guehna mmamp'u ja rá ley bi 'yotra Moisés. ⁹ Nuna rá hya nt'ot'i p'u ja rá ley, guehna ngue ena: “Yo gui turpabi rá ne rá ndani nu'a nnehyø trigo ngue di ntaqui”, i ena. A nuna Oja ya, hin'i mmanna rá hya na ngue da høndyø ndani dadi ja ndummui ngue di nnepe di nsihmē. ¹⁰ Sinoque bi manna rá hya na, porque nnepe ngue gue'u yø mēfi Oja da 'bäts'i. Porque n'na rá mēfi di mpep'u ja n'na rá huahi i tømĩ da dahrá nzäbi. Ximmangu'a tacyø trigo, xquet'a tømĩ da dahrá nzäbi ngue'a te pēfi. ¹¹ Nuna rá hya Oja dá mangä'be p'u guí 'buhmũ, tengutho 'mø dá tucä'be n'na rá huahi co nuna rá hya na. Xi ya, ¿ua ya ni mmuihũ ya ngue'mø gui fäxcä'be te dí hongä'be ya? ¹² Conque gadi unhnũ te hon'u mi'da yø mamhya. Goma guecä'be p'uya ngue man'natho ni 'yup'u ngue gui 'dacja te dí hongä'be.

Pē nugä'be hĩnte dí xi'ahũ 'mø ja te dí hongä'be. A nu'mø hin'yu te ga hongä'be, dí hāt'i dí setä'be p'u. Porque hĩndĩ nnegä'be ngue da gohyø mmui yø ja'i guehna rá hoga 'da'yo hya rá Cristo dí mmangä'be. ¹³ Pē guí pahmũ xanho ngue nu'u yø ja'i øtra 'befi p'u ja rá nija di mpeti yø

judío, nu'a tema cosa haxyø ja'i p'u ja ra nija, gue'a ja ngue da zi'a. Nuya dí mmangä guehya yø ja'i ho yø zu'e ngue øtra 'bøt'e p'u ja ra altar, guehya di tocabi sa ra ngø nu'a pøt'e. ¹⁴ Ximmangudya, nuna ra Cristo bá sänni ngue nu'u yø mēfi manna hoga 'da'yo hya, nu'u yø ja'i sihra hya gue'u go di pøn'a te honyø mamhya'u.

¹⁵ Pe nugä hinjam'mø te dí xi'ahü ngue guí fäxcahü 'mø ja te dí honi. Madague'a ni 'yup'u ga xi'ahü ngue gui fäxcahü, pe hinte dí xi'ahü. A nugä ya, hinna ot'ä na ra súcua ja ua ngue gdí ädi gui 'dacju te dí honi. Man'na xanho gá tü ua ra thuhu, hinda gue'a ngue gui 'yēnjü ngue dí ädi gui fäxcahü. ¹⁶ 'Yo guí emhmü ngue ra matetho dí øt'e ngue dí xi'ahü ra hoga 'da'yo hya. A nugä, ya ma 'bēfigä'a, i høxhma xi ngue ga mmanna hya. Huēcategui ngue'mø hinga mmangä na ra hoga 'da'yo hya. ¹⁷ A nuyá, nu'mø ngue ma pähäse nnä mmangä na ra hya na, ya ja rá njut'i xanho. Pe nja ngue hingma pähäshe te dí øt'e, sinoque ja ts'editho ngue ga mmanna hya, porque Oja bi 'dacrä 'bēfi ngue ga mmambrä hya. ¹⁸ A nuyá, nuna dí ør'mä güenda ngue ma nzäbi ya, i ja grä pähä ngue hinte dí jui guehna ra hoga 'da'yo hya dí mma. Madague'a ja grä nt'edi ga xi'ahü ngue gui 'dacju te dí honi, pe nugä hinte dí xi'ahü ngue gui 'dacju.

¹⁹ A nuyá, madague'a ngue hinjonni ja'i di 'bui ngue ma hmu, pe nugä dí øt'e ngue tengutho 'mø di nnøpa hmu gätho yø ja'i. Porque dí nne ga japi ngue xtangu yø ja'i da 'yēc'ei ra Cristo. ²⁰ Nu'mø dí 'bucä p'u ha 'bøhyø judío, dí øt'ä tengutho øtyø judío, n'namhma ngue xamhmatho ga tapyø mmui ngue da 'yēc'ei ra Cristo. Tengutho øt'u to øt'a te mmamp'u ja ra ley bi 'yotra Moisés, gue'a dí øt'ä'a. Madaque'a ngue hingui ja ts'edi ga øt'ä te mmamp'u ja ra ley, pe dí øt'e para ngue xamhmatho ga tapyø mmui yø ja'i ngue da 'yēc'ei ra Cristo. ²¹ Nu'mø ngue dí 'bucä p'u 'bøhyø ja'i hingui padí hanja ra ley bi 'yotra Moisés, dí øt'ä tengutho øt'u, n'namhma ngue xamhmatho ga tapyø mmui ngue da 'yēc'ei ra Cristo. Pe hindí nne ga mma ngue ga ena ya hindí tennba rá ley Oja, sinoque dí tenna ley bi manna Cristo. ²² Nu'mø dí 'bucä p'u 'bøhyø 'yēc'ei ngue hingui nzaqui yø nt'ēc'ei, dí øt'e tengutho øt'u, n'namhma ngue da zäp'u ga hatra ts'edi yø nt'ēc'ei i ja. Nná øt'ä'a ngue 'da'igu dí ør'be yø ja'i 'bup'u ha dí mmanna hya, n'namhma ngue xamhmatho da zäp'u di nyanyø te 'da'u øxra hya dí mma. ²³ Nguna ra hya dá øt'ä ya, n'namhma ngue da zäp'u da 'yøhyø ja'i ra hoga 'da'yo hya. Nu'a rá njapi Oja bá n'youi na ra hya na, da zäp'u di tocabi gätho'u bi 'yøde hanja ra hya.

²⁴ Ya guí pähmü ngue nup'u ja n'na ra xequi majuanni ngue di nja ra 'dihi, gätho'u to da gæcra 'dihi, n'na ngu n'na ni tihi, pe n'natho'a da dāha. Dami njathu p'uya, guí ja ndummui gui 'yøthü'a te di 'bep'ahü Oja gui 'yøthü, n'namhma ngue da zäp'u gui tahmu. ²⁵ Gätho'u to honi ha di dap'u ja ra nt'eni, hinte nne di hēni para ngue da dāha. Pe nuya

p'uya, di ja ndummai ngue da da'a n'na ra corona ngue da thotho, porque ra paxitho. Pe nuju, dadi ja ndummai ngue ga othu'a te di 'bejpah Oja, n'namhma ngue di 'dacju ra njapi, nu'a hinjam'mo da thogui. ²⁶ Nuna ra hya nná 'yogä, dí haxra 'yu nu'a ja ngue gdá n'yo, hinda päjtho'a te ja ngue gdá n'yo. Nugä dí ho ma mmui ha gda orpabi rá pähä Oja, porque hinda nne ngue hinde di bontho na rá 'befi Oja nná 'yo. ²⁷ Nu ra ja'i 'mo nne ngue da dāha, di n'annbi ngue emmei di xadi ha di dāha. Di njadā p'uya, di ho ma mmui ngue dí honi ha di ntahna ra hya nná 'yo. Porque dí nne ga ot'e tengutho ra hya di xihyø ja'i da 'yot'e. Nugä hinda nne da 'yenc'a Oja ngue hinga gue'a te dí ot'e.

10 ¹ Ague ma zi cu'ah, mamí pumbenih na ra hya ja ua, ngue Oja bi 'yot'e ngue ni 'bet'o ra gui p'u ni ma yø nyogui ja'i nuya bi japi bi 'daxra Thenga jathe. ² Gätho ya yø ja'i ya, 'dap'u ni 'youi ra Moisés ngue ni denna gui, 'ne gä 'da i thorpū ja ra jathe. Guehya yø ja'i bi 'yot'e ngue yø n'youi ra Moisés. ³ Gätho yø ja'i bi zi'a ra hme bí 'yε mahets'i. ⁴ 'Ne gätho yø ja'i bi zi'a ra dehe bi bop'u ja ra mmundo. Pe nu'a bi 'uintho yø ja'i, hinga do, sinoque gue'a ra Cristo bi mäxyø ja'i hapu ni ma. ⁵ Pe nuna Oja, himbi nu manho te bi 'yøtyø ja'i m'mefa. Janangue ya mme gä bi du p'u ja ra dapo.

⁶ A nuyá, nuna ra ndate bi thohya yø nyogui ja'i bi 'yøtra nts'o, nu'mo ngue 'necju ga othu ra nts'o ya, xquet'a ngu'a ra ndate ga thohmu. ⁷ Janangue nuyá, 'yo gui thannehu yø dahmu tengutho bi 'yøt'i'da'u ngue bi danne yø dahmu. Porque nt'ot'i p'u ja ra Maca Libro te bi 'yøtyø ja'i, i ena: “Bi mi yø ja'i ngue di nsihme, 'ne bi mmihni. Mi juate ra ts'ihme yø ja'i, bi nangui ngue bi danne ra dahmu. Bi mura hnei p'uya”, enna Maca Libro. ⁸ 'Ne hinga n'yots'om'mäihu tengutho bi 'yøt'i'da'u ngue bi n'yots'om'mäi. Ngue nguna bi 'yot'e, n'na patho i du 'däte mahyu mahuah yø ja'i. ⁹ Nuna Oja i seti te dí othu, pe hinguí sã ngue xøgue gdá othu'a ngue ga unhna ra cue Oja. Nguna bi 'yøt'i'da yø nyogui ja'i, pe mi sōtrá mmui Oja, bi guadi bi du yø ja'i ngue bi za yø c'eya. ¹⁰ Mamí nōmman'uh Oja tengutho bi 'yøt'i'da'u yø nyogui ja'i ngue bi nōmman'u Oja. Janangue Oja bá pennbabi rá anxe ngue bi hyo ya yø nyogui ja'i.

¹¹ Nuna ra ndate bi thohya yø nyogui ja'i, bi ma macuati p'u ja ra Maca Libro'a te bi nja, n'namhma ngue nu yø ja'i 'buhya yø pa rá nzequitho dí 'buhmu, da sifi ngue 'yo di njap'u. ¹² Janangue nu te'o ena ngue hinjam'mo da 'yøtra ts'oqui, jatho ngue di mfädi xandønho manma 'yøtra ts'oqui. Porque yø nyogui ja'i bi 'yøtra ts'oqui. ¹³ Nu'mo so ma mmuihu ngue ga othu ra nts'o, xquet'a njarbutho gätho mi'da yø ja'i. Pe nuna Oja hinguí hegah na, da mäxcahu ngue hinda dajpa ma mmuihu

ra nts'o. Nu'mø ya bá ep'u ra ts'on'yomfēni, nuna Oja di mfäxte ngue da zä ga taphu'a ra nts'o ngue hīndi nja.

¹⁴ Janangue nuya ma zi cu'ahū, 'yo guí thannehū yø dahmu. ¹⁵ Da dīnni mmuihū na ra hya ga mmangä ya. I sä ngue gui hyacsehū ra güenda ngue'mø gue'a dí xi'ahū ogue hīn'na. ¹⁶ Nu'mø dí äphū Oja ngue di japa vaso 'mø dí sihū ra Santa Cena, çhuangui ga mbøni ngue nuya yø ja'i si, guehya yø ja'i i mænna ji ra Cristo p'u ja ra pont'i ngue da yāni? Nuna ra thuhmē dí xēni ngue dí sihū, çhuangui ga mbøni ngue nu to gätho di sihū na, gue'u yø ja'i i unnä do'yo ra Cristo p'u ha bi tho na ngue da yāni? ¹⁷ A nuyá, xa nguju ya. Pe ma mmuihū, xøgue 'da'igu porque nu'a ra thuhmē di xēni ngue di comhmi di sihū, n'natho'a.

¹⁸ Guí nnuhū te øtyø judío 'mø ørpa ra 'bøt'e Oja. Nu to gätho sa ra ngø i tho ngue ørpa ra 'bøt'e Oja, i comhmi sa, porque 'da'igu yø mmui ngue'a ra ndanne øt'e. ¹⁹ Nuna te dí nne ga mmanya, hinga mbøni ngue da t'ēmbi ja rá ts'edi n'na ra dahmu. Ni xinga gue'a ra ngø 'børpabi ra dahmu da t'ēmbi man'na xanduxqui ngue'a ra ngø hinga m'møt'e.

²⁰ Nuna ra hya dí mmangä, ngue nu'u yø ja'i hinguí pa Oja, ørpa ra 'bøt'e ra dahmu, gue'u yø ts'onthi ørpabi ra 'bøt'e 'nē hinga gue'a Oja ørpabi ra 'bøt'e. Pe hīndi nnegä ngue 'nē'ahū gui cohi ngue da 'da'igu gui 'yøthū ya yø ja'i thanne yø ts'onthi. ²¹ Hinguí sä ga sihū ra Santa Cena bi zogahū ra hya ra Hmu Jesús ngue ga øthū, 'nē xinga mmähä p'u ha ts'a ra ngø nu'a 'bøspabi yø ts'onthi. ²² 'Yo guí nne ngue da zəcju ra Hmu Jesús. çTeni 'be'a guí ena go ga japhu'a?

²³ A nuyá, ya hīndi mandagahū ra ley ga 'yo yø judío ya. Ya sä ga øthū te dí nnehū ya. Pe hinguí ja ngue ga øthū'a te hīnni 'yup'u ga øthū. Hinga nne ngue ga øthū'a te di ts'onnbabi rá mmui ma mmic'eihū.

²⁴ Jatho ngue ga honnbahū ra nho mi'da yø ja'i, hingue masque ga honse ra nho gdä 'buhmū.

²⁵ Nu'a ra ngø pä yø ja'i p'u ja ra täi, dami sihmahū hma. 'Yo tema nt'änni guí øthū porque 'yo sä gui su guí sihū'a ra ngø xa 'bøspabi yø dahmu. ²⁶ Porque nu te gä ja ua ja ra ximhäi, gä rá mmeti Oja.

²⁷ Nu'mø da zixahū ra ts'ihmē n'na ra ja'i ngue hīngra 'yēc'ei 'nē guí n'unī ngue guí mmähä, dami sihū te di 'da'ahū. 'Yo 'be guí änhnū ngue'mø ra 'bøt'e ra ngø ogue hīn'na. 'Yo sä guí su gui sihū. ²⁸ Pe nu'mø toni ja'i da 'yēn'ahū: “Nuna ra ngø ja ua, ya xa 'bøspabi yø dahmu na”, da 'yēnā, 'yo guí sahu ra ngø p'uya. Porque hinguí nnetho ngue gui ts'onnbahū rá mmui ra ja'i nu'a su da za ra ngø ngue ra 'bøt'e.

²⁹ Madague'a guí pahmū ngue gätho yø ngø 'da'igu, pe 'yo guí sahu ra ngø 'mø embyø ja'i ngue hinguí ho da ts'i.

A nuyá, rá nzegui 'bu i'da ngue nne da 'yēngui: “çHanja ngue ga ets'a te dí si connä ngue'a te rá n'yomfēni n'nan'yo n'na ra ja'i?” da 'yēngui.

³⁰ “Xi'mø dí äprá mate Oja ngue di japi te dí si, ðteni 'be'a go nne'a n'nan'yo n'na ra ja'i ngue da 'yörpa rá hya te di si?” da 'yengui. ³¹ Nugä ga xi'ahü hanja na ra hya na. Nu'mø guí sihmehü ogue guí sithehü, ogue ja te man'na macosa guí øthü, nu te gä guí øthü, dami hyomhmü ra hya ngue ha di t'espabi Oja. ³² 'Yo guí nnehü ngue go da t'enju ngue di jathü ra 'yu hapü øtra ts'oqui mi'da yø ja'i, ngu'u yø judío, ngu'u hingyø judío, ni xinga gue'u yø ja'i Oja. ³³ Conma parte, dadi ja ndummui ngue dí øt'ä'a te 'be'a ja ngue da nu manho yø ja'i. Porque hingma nhose dí honi, sinoque dí honnbabi ra nho da n'yo mi'da yø ja'i para ngue di nyanyø te.

11 ¹ Tengutho guí nnuhü dí øt'ä ya, da ngu'a gui 'yøthü. Porque nugä dí øt'e tengutho bi 'yøtra Cristo.

² Ague ma zi cu'ahü, dadi johyagä ngue zant'a guí mbenjü, 'ne hingui hehmü na ra hya dá xän'nahü. ³ Pe nugä jap'u n'na ra hya dí nne ga xi'ahü. Dami pahmü ngue nuna Oja i 'bet'o na ngue ra Cristo. Ra Cristo p'üya, i 'bet'o na ngue ra n'yohü. Ra n'yohü p'üya, i 'bet'o na ngue rá xisu. ⁴ Nu'mø mmat'Oja n'na ra n'yohü p'u ja ra nija, ogue nne da manna hya di bennba Oja da ma, 'ne'mø hustho rá fui ra n'yohü, ya di nequi ngue händi respeta xanho ra Cristo. ⁵ Nu n'na ra xisu 'mø ngue mmat'Oja p'u ja ra nija, ogue i nne da manna hya di bennba Oja da ma 'ne hingui 'ue rá ya, ya di nequi ngue händi respeta xanho rá damme. Nu'mø hingui 'ue rá ya ra xisu, ya øt'e tengutho yø xisu nt'axi yø ya. ⁶ Nu ra xisu hingui nne da 'ue rá ya, man'na xanho da 'yaxrá ya. Pe nu'mø enna xisu ngue ra 'be'isä ngue da 'yaxrá ya, man'na xanho da 'ue rá ya 'mø. ⁷ A nu ra n'yohü, hingui sä da hyusta rá fui p'u ha dí mpeti yø ja'i, porque Oja bi hocra n'yohü ngue bi gohi tengutho'a. Janangue connä guehra n'yohü i t'espabi Oja. Pe nu ra xisu, i 'bui ngue ga t'espabi ra n'yohü'a. ⁸ Porque Oja, nu'mø mambi hocra n'yohü, hingra xisu'a bi tajpabi rá do'yo ngue bi nhohra n'yohü. Sinoque ra n'yohü'a bi tajpabi rá do'yo ngue bi nhohra xisu. ⁹ A nu ra xisu, bi ma mahoqui para ngue rá mäxtetho ra n'yohü, hingue masque ra n'yohü bi ma mahoqui para ngue drä mäxtetho ra xisu. ¹⁰ Janangue guehna dí mmangä naya ngue ra xisu jatho ngue da 'ue rá ya, gue'a ra hmeya'a ngue ec'ei rá damme 'mø nzofu. 'Ne gue'a nnu manho yø anxø Oja'a. ¹¹ Pe Oja bá sänni ngue ngu yø n'yohü, ngu yø xisu, mahyonitho ngue di m'mui. ¹² Porque majuanü ngue nup'u bá fudi bá m'muhra xisu, guep'u ja rá do'yo ra n'yohü bá thaqui. Pe xquet'a majuanü ngue nu ra n'yohü, ra xisu di mi'mi. Nuna p'üya, gätho Oja bá sänni ngue njap'u.

¹³ Dami hyacjü xanho ra güenda na ra hya dí xi'ahü ya. Xi n'na ra xisu 'mø mmat'Oja, çua xanho ngue da 'ue rá ya uague hin'na? ¹⁴ Ya guí nnuhü te øt'e gätho yø ja'i. Nu ra n'yohü, hingui nnu manho ngue

xtamma rá xta. Porque ẽmbi ngue ra 'be'isä. ¹⁵ Pẽ ra xisu i nnu manho ngue xtamma rá xta. Porque gue'a rá xta bi t'unni ngue da nopa nt'eya. ¹⁶ Pẽ nu'mø 'bui to i nne di nnemhya guehna ra hya dí xi'ahũ ya, da bata njuani ngue ni xinga guecjũ, ni xinga gue hmi'da yø ja'i Oja i 'bui ndap'ũ bi zä yø hnini ngue da n'nan'yo man'na ra hya di tenni.

¹⁷ I ja man'na ra hya dí nne ga xi'ahũ ya. Porque nup'ũ ha gadi mpetihũ, hinga gue'a te guí øthũ. Ngue hinga nho gni mpetihũ, sinoque n'na ra n'ũtho gni mpetihũ. ¹⁸ Dí øcä ngue nup'ũ ha gadi mpetihũ gadi njun'mahyahũ. Rá nzegui majuanĩ na ra hya dí øcä. ¹⁹ Pẽ ngũtho ya ja ngue da ngu'a di nja, ngue di nja ra njun'mahya p'ũ ha guí 'buhmũ. Gue'a di fa'a ndana ra ja'i ngue majuanĩ ra 'yẽc'ei, ndana ra ja'i himma juani ra 'yẽc'ei. ²⁰ Janangue nu'mø gadi mpeti ngue gui sihũ ra Santa Cena, hinguĩ nnu manho ra Cristo te guí øthũ. ²¹ Porque nu'mø bi zonna ora gui nsihmẽhũ, n'na ngu n'na yø ja'i xũhyø hme ni hya ngue da zi. Da mi, di nsihmẽ sehe p'ũya. Pẽ nu yø ja'i ngue hyoya, i tu manthũhũ, mente mi'da yø ja'i p'ũya i niya asta ititho. ²² ¿Ua hin'yu ni ngu guí si'a te gui timhmũ? ¿Hanja ngue hontho guí nne ngue gadi 'berpahũ yø sä'ũ yø ja'i Oja i hyoya, hin'yu te di nsihmẽ p'ũ ha gadi mpetihũ? ¿Ua guí ẽhmũ ngue dí nnu manhogä te guí øthũ? Nu'a, hin'na'a.

²³ A nuna ra Santa Cena dí xi'ahũ, guesẽ'a ra Jesucristo bi xänngagui hanja na ra hya na. Nu'a ra xui bi ma ma dä ra Hmu Jesús, bi hyacra thũhmẽ. ²⁴ Mi ja mammadi Oja, bi xemp'ũya. Bi 'yẽmbyø xädi: “Dami sihũ ra thũhmẽ ja ua ya. Guehna ma do'yogä na. Nu'mø gä sihũ yø pa di map'ũ naya, gue'a gdi benjũ'a ngue ma do'yo dadi dä ngue da du connä ngue'ahũ”. ²⁵ Mi juadi bi nsihmẽ p'ũya, bi decra vaso, bi 'yẽna: “Nuna ya, guehna ra hmeya naya ngue nu'mø dá tu, di nja rá ts'edi na ra 'da'yo cohi øt'ahũ Oja. Porque di mfamma ji connä ngue'ahũ. N'na ndi ngu n'na ndi guí sihũ naya, dami benjũ ngue dá tugä”, bi 'yẽna. ²⁶ Janangue n'na ndi ngu n'na ndi guí sihũ na ra thũhmẽ na, 'nẽ guí sihũ na rá ngui ra uva, gui 'yøthũ ngue da bahyø ja'i ngue bi du ra Hmu Jesús. Dangu'a gui 'yøthũ asta guehra pa ngue da ẽp'ũ ra Hmu Jesús.

²⁷ A nuyá, nu to bi zä ngue hinguĩ nnu mansu na ra Santa Cena 'mø bi zi, ya ra ts'oqui øt'e. Porque hinguĩ nnu mansu'a ra Hmu bi männä ji p'ũ ha bi du connä guehra ja'i. ²⁸ Janangue nuyá, n'na ngu n'najũ, ma ga hacjũ ra güenda te ja ma n'yomfẽnihũ hante ngue ga sihũ ra Santa Cena. ²⁹ Porque nu'mø ngue sä da zi ra Santa Cena ra ja'i, 'nẽ hinga 'bet'o hacra güenda hanja te ga mbøni ngue bi du ra Hmu, ra ja'i ya honse rá castigo da thogui. ³⁰ Ja njap'ũ ngue xangu yø ja'i tho ra castigo, sä ra n'ũ ngue di hyenni. Ya hinguĩ nzaqui 'da, 'nẽ ya xandu 'da. Porque hinguĩ

nnu mansu ra Santa Cena. ³¹ Pe nu'mø ngue ga hacju ra güenda xanho p'u ja ma n'yomfënihu tengue ga mbønna Santa Cena, ya hin tema castigo ga thohmu. ³² A nuya yø ja'i hingui hacra güenda xanho p'u ja yø n'yomfëni tengue ga mbøni, guehya da pennbabi ra castigo Oja ya ngue di hyenni. Porque Oja nnepe ngue di 'bätyø n'yomfëni yø ja'i, n'namhma ngue hinda map'u ja ra castigo di ma yø ja'i hingui ec'ei Oja.

³³ Janangue nuya ma zi cu'ahu, nu'mø gadi mpetihu ngue 'dap'u gui sihmehu, dami ntø'mi n'na ngu n'na'ahu ngue 'da gdi nsihmëthohu. ³⁴ Pe nu'mø ngue to hingui hätra thuhu, 'be di nsihmë 'mø bi nexpu ja rá ngu, n'namhma ngue hinda 'yøtra ts'oqui p'u ha gadi mpetihu, ya hin tema castigo da thogui. A nu'mø ngue ja mi'da yø hya gui hemphu, ga xi'i ha gdi japhu 'mø dá magä p'u.

12 ¹ Ague ma zi cu'ahu, dí nne ga xi'ahu hanja'a te ørpe n'na ngu n'na yø ja'i na ra Espiritu Santo.

² Ya gui pahmu ngue nu'mø yø pa xa thogui, nu'mø tobe hingmani pahmu Oja, xcá thannehu yø dahmu hingui ya. 'Në conná guehyø dahmu xcá thannehu, hingá pahmu hanja na rá 'yu Oja. ³ A nuyá, nu ra ja'i ena ngue ra Espiritu Santo di bennbabi ra hya i mma, dami padi ha gdi hyacju ra güenda xanho ngue'mø majuaní ra Espiritu Santo di bennbi te mma ogue hin'na. Porque nu ra ja'i ngue ra Espiritu Santo di bennbabi ra hya i mma, guehna ra ja'i hinjam'mø di sanna Jesús. A nuyá, nuya yø ja'i n'youi ra Espiritu Santo, høndya sä da ma ngue ra Jesús gue'a ra Hmu mahets'i'a.

⁴ A nuna rá 'befi Oja i ja, 'dama 'dan'yo ma 'befi di 'bepi da 'yøtyø 'yec'ei. Pe Gä gue'a ra Espiritu Santo øt'e ngue da zä da 'yøtra 'befi yø ja'i. ⁵ N'na ngu n'naju, 'dama 'dan'yo ra 'befi dí pehmü, pe nu te Gä dí øthu, gue'a ra Hmu Jesús dí ørpahu rá 'befi. ⁶ Hinga 'da'ligu ra 'befi bi n'nacju, sinoque 'dama 'dan'yo ra 'befi. Pe gätho gue'a Oja di hatra ts'edi yø ja'i ngue da badi ha di japa 'befi da 'yøt'e. ⁷ N'na ngu n'naju, Oja bi zänni tema 'befi ja ngue ga øthu, gue'a ra Espiritu Santo di hacju ra ts'edi ngue da zä ga ørpahu rá 'befi Oja. Pe nu'a te gätho ma 'befi bi 'dacju, bi 'dacju ra 'befi para ngue da 'yørpabi ra nho ma mmi'yec'eihu.

⁸ Nu 'da yø 'yec'ei ya, ra Espiritu Santo di japyø ja'i ngue da badi xanho p'u ja yø mmui ha di japa hya da ma. Nu mi'da p'uya, di japi ngue da badi ha di japi da man'u yø hya xanhenni, para ngue da zä da dinyø mmui yø ja'i ya yø hya da ma. ⁹ Mi'da p'uya, di japa Espiritu Santo ngue nu'mø mmat'Oja ra ja'i, da dinna mmui ra ja'i ngue di nja'a te äp'a Oja. Mi'da p'uya, ra Espiritu Santo di unna ts'edi ra ja'i ngue da 'yøthe yø därquëhi. ¹⁰ Mi'da p'uya, ra Espiritu Santo di unna ts'edi yø ja'i ngue da 'yøtyø milagro. Mi'da p'uya, ra Espiritu Santo di bennbabi'a te ra hya ja ngue da ma. Mi'da p'uya, di japyø ja'i ngue da badi xanho

ngue'mø guesε ra Espíritu Santo di bennbabi'a ra hya mmanna ja'i ogue hin'na. Mi'da p'uya, ra Espíritu Santo di japyø ja'i ngue da nya yø 'dan'yo hya hinguì padi. 'Bu i'da yø ja'i p'uya ngue ra Espíritu Santo di japyø ja'i ngue da zä da ma te ni bøn'u yø 'dan'yo hya i hma. ¹¹ Pe gätho ya yø 'befi ya, guesε'a ra Espíritu Santo di japyø ja'i ngue da zä da 'yøtra 'befi. Nu'á, go gue'a sännbi n'na ngu n'na yø 'yεc'ei'a ndana gue'a ra 'befi da zä da 'yøtyø ja'i.

¹² Nu ra ja'i, madague'a xangu yø xequi n'youi rá do'yo, pe ra ja'i n'na nc'eiθo. Di njathu p'uya, ngue conna Cristo xanguja ngue dí εc'eiθu'a, pe tengutho 'mø ngue n'na nc'eiθo di jahu ra Cristo. ¹³ Gäthogahu ya, ngu yø judío, ngu'u hingyø judío, 'bu i'da ngue 'buhyø hmu, 'bu i'da ngue hinjo'o yø hmu, pe gäthogahu, nu'mø bi ma ma xixyagahu, ra Espíritu Santo øt'e ngue dí cohi ngue εntho n'na nc'eiθo di jahu. Porque gäthogahu, gue'a ra Espíritu Santo dí n'yohu.

¹⁴ Ya guí nnuhu ngue rá do'yo ra ja'i hinga n'na xequitho i ja, sinoque xangu yø xequi n'youi. ¹⁵ Nu'mø da 'yenná gua ra ja'i: "¿Hanja ngue hingrá 'yegä ra ja'i? Ya hingma n'yogä'be rá do'yo ra ja'i", da 'yena, pe nup'u ja rá do'yo ra ja'i ja n'youi p'u. ¹⁶ Ogue ma guhu da 'yena: "¿Hanja ngue hingrá dägä ra ja'i? Ya hingma n'yogä'be rá do'yo ra ja'i", da 'yena, pe nup'u ja rá do'yo ra ja'i ja n'youi p'u. ¹⁷ Xi'mø ngue gä rá nguni rá do'yo ra ja'i, gä dyø dä, cha di zä ga øhmu ra hya 'mø? Ogue gä ma do'yohu, gä dyø gu, cha di zä di nja ma fahahu 'mø? ¹⁸ Pe Oja bi 'yøt'e ngue bi njap'u ma do'yohu. N'na ngu n'na yø xequi ja rá do'yo ra ja'i, bi japi hapu bi nepe da me. ¹⁹ A nu'mø ngue gätho ya yø xequi ja rá do'yo ra ja'i, da 'da'igu, cha di zä di nequi ngue ja rá do'yo ra ja'i 'mø? ²⁰ Pe nuna ra hya i ja, madague'a ngue xangu yø xequi n'youi rá do'yo ra ja'i, pe gätho ya yø xequi ya, gue'a guí nequi xanho ngue ja rá do'yo ra ja'i'a.

²¹ Nu yø dä ra ja'i, hinguì sä da 'yembyø 'ye: "Nugä hındí hon'a'i", da 'yembi. Nu rá ya ra ja'i, hinguì sä da 'yembyø gua: "Nugä hındí hon'au", da 'yembi. ²² Pe gätho ya yø xequi ja ma do'yohu, gätho mahyonitho. A nu yø xequi dí εhmμ ngue hin'e mahyoni, gue'u yø xequi ma datho mahyoni'u. ²³ I ja 'da yø xequi n'youi ma do'yohu ngue εntho hints'ehmi su t'ørpa masu, pe gue'a ra xequi'a ngue man'na dí päxhu xanho. 'Ne ja n'na ra xequi ma do'yohu ngue hinguì sä da hnu, 'ne guehna ra xequi na p'uya ngue man'natho dí suphu na. ²⁴ I ja yø xequi ma do'yohu ngue di nequi, 'ne hinte man'na dí honi ngue ga japhu. Nuna Oja bi hoqui gätho ma do'yohu, 'ne bi 'yøt'e ngue man'na di muui'a ra xequi dí εhmμ ngue hinga njuani p'u guí nequi.

²⁵ Janangue nuyá, hinga 'da'a n'nanni 'yo rá do'yo ra ja'i, sinoque gätho'u yø xequi ja rá do'yo ra ja'i, n'na ngu n'na, di nhyoni. ²⁶ Nu'mø

ngue di hyenna n'na xequi rá do'yo ra ja'i, gä rá do'yo ra ja'i di hyenni. Nu'mø ja n'na ra xequi rá do'yo ra ja'i gue hnu mansu, gä rá do'yo ra ja'i, gä di johya.

²⁷ A nuyá, guecju'a nnøpe gue rá do'yo ra Cristo ya. N'na ngu n'naju, guecju'u yø xequi n'youi p'u ja rá do'yo'a. ²⁸ Njarbutho Oja ya, n'na ngu n'na yø 'yēc'ei bi zännbi ndana gue'a ra 'befi da zä da 'yøt'e n'na ngu n'na. Rá muditho, Oja bi unyø 'befi'u yø representante ra Cristo. Rá yoho, 'buhyø ja'i gue bi t'unna 'befi gue da manna hya di bennbabi ra Espíritu Santo gue da ma. Rá hyu, i 'buhyø ja'i gue bi t'unyø 'befi gue di nxännbate rá hya Oja. I 'buhyø ja'i bi t'unyø 'befi gue øtyø milagro. I 'buhyø ja'i bi t'unyø 'befi gue da 'yøthe yø därquēhi. A nuyá, i 'buhyø ja'i bi t'unyø 'befi gue fäxyø mmic'eiui. 'Nē i 'buhyø ja'i gue bi t'unyø 'befi gue di manda p'u ja ra nija. I 'buhyø ja'i gue bi t'unyø 'befi gue da nya'u yø 'dan'yo hya hinguī padī. ²⁹ Pē hinga to bi zä gue da zä da 'yøtra 'befi gue drá representante ra Cristo. Ni xinga to bi zä ni ja'i da zä da 'yøtra 'befi gue da nya'u yø hya di bennbabi yø ja'i ra Espíritu Santo da ma. 'Nē hinga'da gui t'untho yø 'befi yø ja'i gue da zä di nxännbate rá hya Oja. 'Nē hinga'da gui t'untho yø 'befi yø ja'i gue da zä da 'yøtyø milagro. ³⁰ 'Nē hinga'da gui t'untho yø 'befi yø ja'i gue da zä da 'yøthe yø därquēhi. 'Nē hinga'da gui t'untho yø 'befi yø ja'i gue da nya'u yø 'dan'yo hya hinguī padī. 'Nē hinga'da gui t'untho yø 'befi yø ja'i gue da zä da ma te ga mbøn'u yø 'dan'yo hya i hma. ³¹ Damī nehū gue Oja di 'da'ahū rá 'befi nu'a mā datho tate di muui. Pē nugä, nuna man'na ra hya tate di muui gue mi'da yø hya, guehna dī nne ga xän'nahū naya.

13 ¹ A nuyá, madague'a gdi padī gdá nyahū'u yø hya yø 'dan'yo ja'i, oque gdi padī gdá nyahū'u yø hya ga ya yø anxē, pē nu'mø hin dadi mahma mmic'eiū, ya hinte dadi muhū. Nu mā hyahū hinte di muui porque di cohmu tengutho ra t'egui 'mø mā zunt'i, oque tengutho ra xit'egui di zunt'yø hyuxi. ² Madague'a gdi padī gdá nya'ahū'u yø hya di bennbabi ra Espíritu Santo yø ja'i da mā, oque gdi pahmu gätho'u yø hya xanhenni, oque gdi timhmu xandønho hanja'u yø hya hinguī fadi hanja, oque di ja xanho mā nt'ēc'eiū, asta ga emphu yø nyuni gue da 'uegue, danī mpa n'na nguadi, 'nē di nja, pē nu'mø hin dadi mahma mmic'eiū, ya hinte dadi muhū. ³ Madague'a ga dat'i gätho'a te dī peshu gue ga unhnū te da zi yø hyoya, oque asta ga n'uni gue da ma nt'udi gahū, pē nu'mø hin dadi mahma mmic'eiū, ya hinte dadi muhū.

⁴ A nu ra ja'i gue majuanī di mahrá mmic'eiui, guehna ra ja'i seti te sifi. Guehna ra ja'i ja rá yemmui. Guehna ra ja'i hinga zeya. Guehna ra ja'i hindi 'yēts'i hapu ya. ⁵ 'Nē di jammansu rá mmic'eiui. Hinguī honse ra nho da m'mui, sinoque honnbabi ra nho yø mmic'eiui. 'Nē hinga cue.

I ja rá mpunnbi tengue t'ørpe. ⁶ Hindi johya 'mø nnu ngue øtra ts'oqui mi'da yø ja'i, sinoque di johya 'mø nnu ngue njuantho ga 'yo yø ja'i.

⁷ Nu'mø di mahrá mmic'eiui n'na, ya di siguetho di madi madague'a hingui ho te ørpabi. Zant'a embra mmui ngue xanho te øtra mmic'eiui, porque hingui nne da hyep'u'a gui madi. I tømí ngue di n'yo rá mmui rá mmic'eiui 'mø ngue hinga gue'a øt'e.

⁸ A nuyá, nu'a ngue ga mahma mmic'eiui, i jatho ngue hinha rá nzegui ga mahma. Pe nuya yø 'befi bi 'dacju Oja, di njap'u rá nzegui ya. Porque da 'yehra pa ngue ra Espíritu Santo ya hinni mantho di bennba yø ja'i ra hya da ma. Da 'yehra pa ngue ra Espíritu Santo ya hinni mantho da japyø ja'i da nya yø 'dan'yo hya. Da 'yehra pa ngue ra Espíritu Santo ya hinni mantho ngue ja da xännbabi yø ja'i'u yø hya xanhenni. ⁹ A nuyá, majuaní ngue hinga gätho dí pahmu hanja yø hya. Porque Oja hingui udi gätho'a te ra hya i ja. ¹⁰ Pe da 'yehra pa ngue gäthogahu ga pahmu xanho hanja ra hya. Nu'u yø pa'u, ya himma hyoni ngue di m'muhyø ja'i da xännba ra hya yø mmi'yec'eiui.

¹¹ A nu'mø mará ngüegui, dí mmanyø hya ga nya yø basi. Nu ma n'yomfeni mi ja, tengutho yø n'yomfeni yø basi. Pe nuyá, ya dá ndan'yohu ya, ya bi gop'u'u yø hya xtá mangä 'mø mará ngüegui.

¹² Nuyá, nup'u ga mbemma mmui hanja ra hya ya, entho tengutho 'mø di hëtra hye, hindi nequi xanho hanja gätho yø hya. Pe da 'yehra pa ngue ga nnurpahu rá hmi ra Cristo. Ya ja ga pahmu p'u xanho hanja ra hya p'uya. A nuyá, zits'utho dí pahmu hanja ra hya ya, pe nu'u yø pa'u, ya ga pahmu xandønho gätho hanja, tengutho Oja i pacju xandønho'a.

¹³ Janangue ja ua ya hyu yø hya zant'a ja ts'editho ngue ga øthu. Ja ts'editho ngue zant'a ga ec'eiui Oja. Ja ts'editho ngue zant'a ga emhma ngue di nja'a te mman'Oja. 'Ne ja ts'editho ngue zant'a ga mahma mmic'eiui. Pe nuna ma datho di muui ya hyu yø hya ya, gue'a ngue zant'a ga mahma mmic'eiui.

14 ¹ Dami ja ndummui ngue guí mahni mmic'eiui n'na ngu n'na'ahu. Nuna Oja, 'dama 'dan'yo yø 'befi i ja, pe dami ne ngue da zä gui 'yørpahu rá 'befi Oja. 'Ne ma datho dami nehu ngue di m'muhyø ja'i ngue ya dyø 'befitho'a ngue da manna hya di bennba Oja.

² Porque nu'mø 'buhra ja'i ngue ga ya'u yø hya hingui fadi, ya hingyø ja'i'u nzofo, porque hinjongui øde te ga ya. Hinda hønse Oja padi tema hya manna ja'i. Porque ra Espíritu Santo di hatra ts'edi di bennbi te da ma, pe hinjongui padi te ga mbønyø hya i mma. ³ Pe nu ra ja'i ngue di bennbabi Oja ra hya ja ngue da xihyø ja'i, gue'u yø ja'i nzofo para ngue di zacyø nt'ec'ei yø ja'i. Di hatra ts'edi yø ja'i na ra hya øde hma, 'ne hurpabi yø mmui. ⁴ A nuya yø ja'i ga ya yø 'dan'yo hya, guehya hinjongui øde te ga ya, sinoque pase hanja'a ra hya mma. Pe nu ra ja'i

ngue di bennbabi Oja na ra hya da xihyø ja'i, nuya yø ja'i di mpeti, di japi ngue da dinyø mmui yø ja'i na ra hya xifi.

⁵ Mahotho 'mø ngue gätho di sä gdi nyahu yø 'dan'yo hya hinguí fadi. Pe ma datho dí nnegä ngue di ben'nahü Oja'a te ra hya gui xihmu yø ja'i. Porque man'na xanho ngue da 'yøde xanho yø ja'i'a te ra hya gui mmamhmu, hinda gue'a ngue gdi nyahu n'na ra hya ngue hinguí øhyø ja'i. Xquet'a xanho, pe gue'mø 'bup'u te'o da zä da ma te ga mbønna hya da hma. Janangue gätho yø ja'i di 'bup'u da dinyø mmui hanja ra hya. ⁶ Ague ma zi cu'ahu, xi'mø ga mmagä p'u ngue ga xän'nahü ra hya, 'ne gdä zo'ahu yø hya hinguí øhmu, indana ra hya gui 'yet'ammuihu 'mø? Pe nu'mø gdä zo'ahu'a te ra hya gni yahu, ya da dini xanho ni mmuihu hanja ra hya 'mø. Ya gui pahmu hanja'a ra hya di bennagui Oja ga mmamp'uya, guehna ra hya da zä ga xän'nahü na.

⁷ Ya gui nnuhu, nu'mø ya ra corneta ximmi ya ra 'bida, nu'mø hindi ntinyø hya, ya hinguí fadi tema so i ja. ⁸ Nup'u ja n'na ra tunhni ya, nu'a pixtra corneta 'mø hinguí padi da mixt'i, aha ya ra corneta, hinte ni bontho. Porque hindi nsä yø ja'i ngue di nja ra tunhni. ⁹ Guí njathu p'uya, nu'mø hinguí øhyø ja'i'a ra hya gni yahu, chague da mbahyø ja'i'a ra hya gui mmamhmu 'mø? aha gadi yahnihu, hinjongui øde te gui mmamhmu. ¹⁰ Nua ja ra ximhai, mandøngu dyø hya ja ua ngue ga ya yø ja'i. Pe gätho'u yø hya ga ya yø ja'i, ja te ga mbøni. ¹¹ A nuyá, nu'mø toni ja'i da zoqui, 'ne ga ya ra hya hindi øde, ya tengutho 'mø da ndø yap'utho rá häi'a nzoqui, porque hinda zä gdä nya'be'a te ra hya ga ya ra ja'i. ¹² Nugä dí padi ngue emmei gui nne di ha'ahu ra ts'edi ra Espíritu Santo ngue da zä gui 'yørpahu rá 'befi Oja. Pe dami nehü ngue nu'a ra 'befi gui 'yøthu, da gue'a ra 'befi ma datho da 'yørpabi ra nho ni mmi'yec'eihi gui 'yøthu.

¹³ Nu to nne da nya yø hya ngue hinguí øhyø ja'i, da 'yäpra mate Oja ngue da zä da xihyø mmic'eiui te ga mbønna hya da ma. ¹⁴ Porque nu'mø dí mmat'Oja 'ne hinguí øhyø ja'i'a te ra hya nna mat'Oja, nua ja ma mmui dí padi ngue dí mmat'Oja, pe nuya yø hya dí mma, ya hin tema nho da 'yørpabi yø ja'i. ¹⁵ ¿Ndana gue'a ja ngue ga øt'a ya 'mø? I ja ngue ga mmat'Oja co gätho ma mmui, pe guehya yø hya øhyø ja'i gdä mat'Oja. I ja ngue ga tutyø alabansa co gätho ma mmui, pe da gue'u yø alabansa ngue øhyø ja'i yø hya i mma. ¹⁶ Nu'mø gadi ja mamadihu Oja, 'ne'mø hinjongui øde tema hya gui mmamhmu, nu ra ja'i øts'e te gui mmamhmu, ya hinguí padi te ga mbønna hya. Ya hinguí sä da 'yenna ja'i da ngut'atho. ¹⁷ Madague'a ngue mazi hotho ha gni ja mamadihu Oja, pe nu'mø ngue hinguí øhyø ja'i'a ra hya gni ja mamadihu Oja, ya hin tema ntho ørpabi yø ja'i ra hya øde.

¹⁸ Nugä dadi ja mamadi Oja ngue mits'u xangu yø 'dan'yo hya dí padi gdä nyagä ngue'ahu. ¹⁹ Pe nup'u di mpeti yø ja'i, nugä dí nnu manho ngue hondi cut'atho yø hya ga xännbabi yø ja'i, pe da gue'u yø

hya øhyø ja'i gdá nya, hinda gue'a ngue ga mmangä 'det'a mahuahí yø hya ngue hingui pahyø ja'i te ga mbøni.

²⁰ Ague mā zi cū'ahū, 'yoní mantho guí øthū tengutho yø basí ngue zits'ū dyø 'nyomfēni i ja. Pē xānho ngue guí cohmu tengutho yø basí ngue hingui ngu rā nts'o pādī, guí njathū p'ūya. Pē ya gyø daja'ihū, dami 'yøt'e ngue ya ja xānho nī 'nyomfēnihū ya. ²¹ Nup'ū ja rā libro ngue rá ley, Oja i ēna: “Nūya yø ja'i ngue yø mmejmahya, ga japi ngue di ts'ofø conyø hya ga ya yø 'dan'yo ja'i. Pē madague'a di ts'ofø conyø 'dan'yo hya, ngutho hinda 'yørcagui masu”, ēn'Oja. ²² Janāngue nūna Oja, nū'mø nzohyø ja'i conyø hya hingui fādī, gue'a rā hmēya'a ngue hingyø 'yēc'ēi yø ja'i ts'ofø, sinoque yø mmejmahyatho. Pē nū'mø nzo Oja yø ja'i conna hya di bēnnbabi yø pøngahya dā mā, gue'a rā hmēya'a ngue ya yø 'yēc'ēi yø ja'i nzofo.

²³ A nū'mø ngue n'narbu xā mpeti yø 'yēc'ēi, 'nē'mø gā ga ya yø 'dan'yo hya ngue hinga nt'øde te ga ya, xi'mø bi yūt'a n'na rā ja'i hinga 'yēc'ēi 'nē hingui pahyø 'dan'yo hya ga ya yø ja'i, uāngui dā 'yēmbi ngue loco yø ja'i di yahni. ²⁴ Pē nū'mø nne dī nya n'na rā 'yēc'ēi ngue dā manna hya di bēnnbabi Oja dā mā, 'nē dā nya rā hya ga ya yø ja'i, xi'mø bi yūt'a n'na rā ja'i hinga 'yēc'ēi 'nē hingui pādī hanja rā nt'ēc'ēi, rā ja'i dā dinnā mmui ngue ja rá ts'oqui co nū'a te rā hya dā 'yøde. ²⁵ Dī 'nyo rá mmui rā ja'i ngue Oja i pādī xānho te gāma hya mbēmp'ū ja rá mmui. Dī ndantyøhmu p'ūya ngue dā danne Oja. Dā 'yēna: “Mājuani ngue gue'a Oja n'youi ua ha dī mpeti yø ja'i 'būcua”, dā 'yēna.

²⁶ Ague mā zi cū'ahū, nup'ū ha gādī mpetihū ya, i 'bui to nne dā dūtyø salmo, i 'bui to nne dī nxānnbate rá hya Oja, i 'bui to nne dā manna hya di bēnnbabi Oja, i 'bui to i nne dā nya yø hya ngue hinga nt'øde, i 'bui to dā zā dā mā te ga mbønyø 'dan'yo hya hinga nt'øde. Pē nū te gāma hya guí nne guí mmāmhmu, guí mmāmhmu'ū yø hya di hātra ts'edi yø ja'i. ²⁷ A nū'mø te'o ga ya rā 'dan'yo hya hinga nt'øde, ya høndi yo nc'ēi ogue hyu nc'ēi dī nya. Pē 'da mī'datho dī nya. 'Nē nnetho ngue di 'bui te'o dā xihyø ja'i teni bøn'ū yø hya dā hma. ²⁸ A nū'mø ngue hīnjo'o p'ū to di thocra hya, man'na xānho ngue 'yo dī nzohyø ja'i'a n'nan'yo rā hya ga ya. Porque hīnjongui øde te ga ya. Sinoque n'na ngu n'na dī nyāseui Oja p'ū ja yø mmui.

²⁹ Xquet'a ngūt'a ya, nū te'o nne dā xihyø ja'i'ū yø hya di bēnnbabi Oja dā mā, dī nya yonc'ēi ogue hyu nc'ēi. Mī'da yø ja'i p'ūya, dā hyācra güenda ngue'mø majúani Oja di bēnnbabi rā hya mmanna ja'i ogue hīn'na. ³⁰ Nū'mø ngue 'bup'ū man'na rā ja'i nne dā xihyø ja'i rā hya di bēnnbabi Oja dā mā, dī nsāya'a ya p'ūya, di japi dī nya man'na nc'ēi nne dī nya. ³¹ Gātho'ahū, nū to nne dā xihyø ja'i rā hya di bēnnbabi Oja dā mā, 'da mī'da dī nya. Janāngue nū'ū yø ja'i øxra hya dā hma, dā dīnyø

mmui hanja ra hya, gue'a di hya ra ts'edi'a. ³² Nu te'o nne da xihyø ja'i'a te ra hya di bennbabi Oja da ma, da døm'i mente da zä di nya. ³³ Porque Oja hinguí nnepe ngue 'da di yahnitho yø ja'i p'u ha ja ra hya.

Nu'a te ør'mi'da yø 'yēc'ei mi'da yø hnini, dangu'a gui 'yøthü.

³⁴ Porque yø xisu hinguí sä ngue di nyap'u ha di mpeti yø 'yēc'ei. Porque yø xisu hin'yu ra nt'edi ngue da gue'u di opan'yu ra hya yø ja'i'u. Sinoque yø n'yohu'u i ja ngue di m'met'o tengutho ra hya mmamp'u ja rá ley Oja. ³⁵ Nu'mø ja tema hya nne da 'yänna n'na ra xisu, da 'yänna damme p'u ja rá ngu. Porque hindi nejmanho ngue ra xisu di nyap'u ha di mpeti yø 'yēc'ei.

³⁶ Mahsä mi 'yēna ngue da zä guí sänse te gui 'yøthü. Porque hingo gá dūmhmu rá hya Oja, sinoque m'mefatho bi zōnna hya p'u guí 'būhmu.

³⁷ Nu'mø toni ja'i da 'yēna ngue di bennbabi Oja ra hya ja ngue da ma, oque to da 'yēna ngue n'youi ra Espíritu Santo, da badi ngue nuya yø hya dí xi'ahü, gue'a Oja di 'bejpasegui te dí mma. ³⁸ A nu'mø toni ja'i da 'yēnguí ngue hinga gue'a ra hya dí mma, da gue'a to mman'a p'uya xquet'a hinguí ja ngue da t'ēmbi ngue gue'a ra hya mma.

³⁹ Ague mā zi cū'ahü, dami nehü ya ngue guesē Oja di ben'nahü ra hya gui xihmu yø ja'i. A nu'u yø ja'i ga ya yø 'dan'yo hya, dami unhnü ra nt'edi ngue di nya. ⁴⁰ Pē da 'yo ni 'yu'a te gāma hya guí mmamhmu, mazihotho gdi mamhmu ra hya.

15 ¹ A nuya mā zi cū'ahü, man'nan'yo mi 'yøt'e ngue guí pumbenihü na ra hoga 'da'yo hya dá xi'ahü ya. Ya gá nu manhohü na ra hya na, 'nē guehna ga dū ni nt'ēc'ei hü naya. ² Nu'mø ngue hinguí hyehmup'u na ra hya naya, gue'mø ngue hingma xøts'etho gni 'yēc'ei hü na ra hya 'mø, guehna ra hya di nyanni tehü na.

³ Nuna ra hya bi siqui, guehna ra hya rá mūditho dá xän'nahü na. Guehna ra hya na ngue bi dū ra Cristo ngue bi hoga mā ts'oquihü. Ya bi nja na te ra hya nt'ot'i p'u ja ra Maca Libro. ⁴ Mi dū ra Cristo, bi ma nt'ägui. Pē bi bennate'a rá hyu pa. Ya mahombi nja ra hya nt'ot'i p'u ja ra Maca Libro. ⁵ Mi bennate ra Cristo, bi nu ra Bedu ngue ya 'bui mahøn'a. M'mefa p'uya, bi nu gätho'u mi'da yø representante ra Cristo. ⁶ Man'na ra pa p'uya, tho'i cut'a ciento'u mā cūhü bi nnuui ra Cristo mahøn'a. 'Nē xangu tobe 'būtho ya, xinxā ndu 'da. ⁷ M'mefa p'uya, bi nu ra Jacobo. Man'na ra pa p'uya, gätho'u yø representante bi nu mahøn'a.

⁸ Mi nu ra Cristo ya to gä bi nu, ya dá nthese'be p'u rá nzequi. Pē nugui, man'natho hinga njuanigui. ⁹ Porque guecä mits'u hinga njuanigä ngue gätho mi'da yø representante ra Cristo. A nugui, ya ra matetho bi 'yøt'Oja ngue bi 'dajma 'befi ngue rá representantegui, porque nugui xtä sūcä ya yø ja'i Oja. ¹⁰ Pē Oja bi 'yøtra mate ngue bi 'dacra 'befi di pēhya, 'nē hinga sārbut'hō'a rá mate bi 'daqui. Porque man'na xangu ra 'befi dí

øt'ä ngue gätho'u mi'da yø representante ra Cristo. Pe nuna ra 'befi na, hingo dadi jasegä na, sinoque ørcagui ra mate Oja ngue faxqui te dí øt'e.

¹¹ A nuyá, nu'mø gueque xangu ra 'befi dí øt'e, oque go gue'u mi'da xangu ra 'befi bi 'yøt'e, pe nuna ra hya dí mmangähe, 'da'igu na. 'Në guehna ra hya guí ec'eihi na ya.

¹² A nuyá, gä 'da'igu dí mmangähe ya ngue bi du ra Cristo 'në bi bennate. ¿Pe hanja ngue guí emhmü ngue händi bennate yø ánima? ¹³ A nu'mø ngue majuaní guí mmamhmü ngue händi bennate yø ánima ya, ¿hanja ngue bi zä bi bennate ra Cristo 'mø? ¹⁴ A nu'mø ngue himma juaní bi bennate ra Cristo, ya hinte ni bontho na ra hoga 'da'yo hya dí mmangähe 'mø. Da guehni nt'ec'eihi p'uya, xquet'a hinte ni bontho 'mø. ¹⁵ Ya ra fehni dí mmangähe 'mø ngue dí xi'ahü te bi 'yøt'Oja. Porque dí xi'ahü ngue Oja bi japi bi bennate ra Cristo 'mø mi du. A nu'mø ngue himma juaní di bennate yø ánima ya, ya himma juaní ngue Oja bi japi bi bennate ra Cristo 'mø. ¹⁶ Xi'mø ngue händi bennate yø ánima ya, ya xmama bi du ra Cristo 'mø. ¹⁷ Xi'mø ngue ra Cristo himbi bennate, nuna ni nt'ec'eihi i ja, ya hinte ni bontho. Porque hinga njut'itho ni ts'oquihu 'mø. ¹⁸ Nu'mø ngue ngu'a ya, nu'u to ya xa ndu, madague'a bi 'yec'ei ra Cristo, pe xquet'a 'në'u di m'më'u. ¹⁹ Nu'mø ngue hinte ni bontho ngue dá ec'eihi ra Cristo mente ra pa dá m'muhmu, ya man'natho huecateju 'mø ngue gätho mi'da yø ja'i.

²⁰ Pe majuaní dí xi'ahü ngue nu'mø mi du ra Cristo, bi bennate. Co nuna ra hya naya, dí haxa njuaní ngue gätho yø ánima xa ndu jatho ngue di bennate m'mefa. ²¹ Nu'a ra ts'oqui bi 'yøtra Adán, ja bá fup'u ngue bi du yø ja'i ua ja ra ximhäi. Pe xquet'a nu'a i bennate ra Cristo 'mø mi du, go bá jutra 'yu'a ngue jatho di bennate yø ánima. ²² Ra Adán, rá 'yu'a ngue gäthogahu, gätho ja ngue ga tuhü. Pe nu to gätho ec'ei ra Cristo ya, ja ngue di bennate. ²³ N'na ngu n'na bá n'youi ra pa p'u ngue di bennate. Rá muditho bi bennate ra Cristo, m'mefa p'uya, nu'mø bá ghra Cristo, nu te'o gä xa 'yec'ei, gä di bennate. ²⁴ Nu'mø ngue bi dapi gätho yø nsuiui, nu'u ena ngue ja yø ts'edi ngue di mmandase, gä di ts'onnbabi yø hya, ya gue'a ra pa rá nzegui'a p'uya. Nuna Oja rá Papá, di daprä cargo p'uya ngue di ndast'abi. ²⁵ Porque ra Cristo jatho ngue gue'a di ndast'abi'a asta gue'mø da 'yøt'a Oja ngue da dapi gätho yø nsuiui. ²⁶ Nu'a rá nsuiui rá nzeguitho da dapi, gue'a ra ndate i ja'a, porque ya hinjon da du. ²⁷ Nuna Oja bi unná cargo ra Cristo ngue gä go di manda te gä ja na. Pe nuyá, hinguí nne da ma ngue ra Cristo di manda rá Papá, porque go gue'a rá Papá bi unná cargo ra Cristo ngue di manda te gä i ja. ²⁸ Da zonna pa ngue da dahra Cristo ngue di manda te gä ja. Ra Cristo p'uya, nu'a rá Papá bi unna cargo ngue di manda te gä ja, di dapi ngue di mandase, ya guese Oja di manda te gä ja p'uya.

²⁹ I ja man'na ra hya dí nne ga xi'ahü ya. I 'bü i'da yø ja'i ngue nyondi i nxixya ngue di pörpabi yø ánima himbi nxixya hante ngue da dü. A nuyá, xi'mø enyø ja'i ngue hindi bennate yø ánima, çhanja ngue nxixya yø ja'i ngue di pörpabi yø ánima tengutho 'mø xtí nxixya hante ngue da dü 'mø?

³⁰ Çhanja ngue hangü ra pa dí engä ma te 'mø ngue hindi bennate yø ánima 'mø? ³¹ Porque n'na pa ngu n'na pa ja ngue da hyo gyø ja'i. Ague ma zi cü'ahü, hontho dí xi'ahü na ra hya na, porque majuaní ngue ja gampähä ngue n'na ngu n'najü, Gä di n'yohü ra Hmu Jesucristo.

³² Nup'u ja ra hnini Efeso, xandøngu ra n'u dá sägä p'u, porque ena yø zate yø ja'i da njun'me. A nuyá, xi'mø ngue hindi bennate yø ánima ya, çteni 'be'a dí taha ngue te dí øt'a 'mø? Man'na xanho ngue ga ena: “Ma ga nsännigo ya, ga mmi ga si te xtá tini. Porque ni xudi ga tu”, ga ena.

³³ 'Yo gadi nhyegui ngue to da hyä'ahü. Porque nu'mø gadi nsixhü'u yø ja'i xants'o ga 'yo, di ts'on'natho'a te ra nho gni 'yohü'u. ³⁴ 'Yo ma'bedi ni mmuihü. Damí hyaxhü ra 'yu njuantho, mami 'yøthü ra ts'oqui. Porque 'bü i'da ngue tobe hingui pahmu Oja. Dí mmangä na ra hya na n'namhma ngue guí pes'nisähü.

³⁵ Rá nzegui 'bü i'da nne ngue da 'yörca ra nt'änni ya, da 'yengui: “ÇHa di njap'u di bennate yø ánima? ÇTengu da gohyø do'yo 'mø bi bennate?” da 'yengui. ³⁶ Gue'a ra ja'i ngue ma'bedi rá mmui da 'yänni tengu na ra hya na. Ya guí nnuhü 'mø bi ma nthuhu n'na ra hmudä, i 'ya rá do'yo ra hmudä, nu'a rá mmui ra hmudä p'uya da bøts'e. ³⁷ Nu'mø bi ma nthuhu ra hmudä, oque ra trigo, oque ja te man'na ma hmudä, hinga tengu nja ra hmudä da thuhu da ngut'atho 'mø bi bøts'e. Sinoque ya n'nan'yo rá do'yo 'mø bi bøts'e. ³⁸ N'na ngu n'na yø hmudä 'mø bi ma nthuhu, nu te nne Oja ngue da gohrá do'yo n'na ngu n'na yø hmudä, gue'a di jap'a.

³⁹ Gätho yø cosa ngue ja yø do'yo, hinga 'da'igu yø do'yo. Nu rá do'yo ra ja'i hinga 'da'iguui rá do'yo yø zu'ë. 'Dama 'dan'yo yø do'yo i ja, n'nan'yo rá do'yo yø ts'int'sü, ndan'yo rá do'yo yø hua.

⁴⁰ Njarbutho te bí ja mahets'i ya. N'nan'yo gui nequi yø do'yo nguep'u gui nequi yø do'yo ya te ja ua ja ra häi. Nu'u bí ja mahets'i, n'nan'yo gui nejmanho ngue'a te gui nejmanho ya ja ua ja ra häi. ⁴¹ N'nan'yo gui yotra hyadi ngue'a gui yotra zana. Xquet'a njarbutho yø sø ya, nu'a te gui yot'i 'da yø sø hinga 'da'iguui yø nyot'i mi'da yø sø.

⁴² Nu'mø ra pa daní bennate ma do'yohü, n'nan'yo da gohi, ya hinda ngu'a tengutho ja ya. 'Ne ya hinda zä da dü 'mø bi bennate. ⁴³ Xants'o rá do'yo ra ja'i 'mø bi t'ägui. Nu'mø bi bennate p'uya, ya di nejmanho rá do'yo. Hingui nzaqui ra ja'i 'mø bi t'ägui, pe nu'mø bi bennate, ya xanzaqui. ⁴⁴ Nu ma do'yohü ja ua ja ra ximhäi da ma nt'ägui. Pe nu'mø

dani bennate p'uya, ya hinma nzä ngue da du. Porque ja rá do'yo ra ja'i ngue da du, xindi nja rá do'yo ra ja'i ngue hinda du.

⁴⁵ I mmamp'u ja ra Maca Libro ngue ena: "Nuna ra Adán, ra mudi ja'i bi m'mui, Oja bi hoqui 'ne bi japi ngue bi nja rá te", i ena. Pe nuna ra Cristo bi m'mu'a m'mefa, ya hinga ja'itho na, guehna da zä di unna 'da'yo te yø ja'i na. ⁴⁶ Rá mudi, bi nja ma do'yohu ngue da du. M'mefa p'uya, di nja ma do'yohu ngue hinda du. ⁴⁷ Nuna rá mudi ra ja'i bi m'mui, ra häi rá do'yo 'mø mi ma mahogui na. Pe nuna rá yoho ra ja'i bi m'mu'a m'mefa, gue'a ra Cristo bi 'ye mahets'i na. ⁴⁸ Gätho yø ja'i 'bu'a nximhäi i ja yø do'yo tengutho rá do'yo na ra ja'i rá mudi bi m'mui ngue ra häi rá do'yo. Pe nu'u yø ja'i di ma mahets'i, di nja yø do'yo tengutho rá do'yo'a bí 'ye mahets'i. ⁴⁹ A nuju, i ja ma do'yohu tengutho rá do'yo ra Adán. Pe m'mefa, xquet'a di nja ma do'yohu tengutho rá do'yo ra Cristo bí 'ye mahets'i.

⁵⁰ Ague ma zi cu'ahu, dí nne ga xi'ahu ya, nuna ma do'yohu n'youi ra ji, hinda zä di m'mup'u ha di manda Oja na. Porque nuna ma do'yohu hinguí zai, ya hinda zä di m'mui para zantho na. ⁵¹ Pe dí nne ngue ga xi'ahu n'na ra hya hinguí fadi hanja. A nuju ya, hinga gätho ga tuhü, pe gä da ma mapädi ma do'yohu, n'nan'yo da gohi. ⁵² Tengutho gui ts'anträ dä ra ja'i, n'na zihmantho di njarbutho'a te ja ngue di nja. Nu ra pa ngue rá nzegui, da t'øde ngue di nya ra corneta. Nu'mø bi nya'a p'uya, nu'u xandu, di bennate ngue di m'mui para zantho. Pe nu'u yø ja'i di 'butho'a ra pa'a, da ma mapädithobi yø do'yo. ⁵³ Porque ma do'yohu hinguí zai, jatho ngue di mpädi, da gohi ngue di nzai. A nuyá, nuna ma do'yohu ja ngue da du. Nu'mø bi zä bi mpädi, ya hinda du. ⁵⁴ Nuna ma do'yohu i tu, bi zä bi mpädi, para zantho di nja ma 'do'yohu. Ya di nja'a te mmamp'u ja ra Maca Libro ngue ena: "Nu ra ndate i ja, di m'mehrá ts'edi, porque da thapi. ⁵⁵ Ya hinda zä da hyoju ra ndate. Porque hinha da zä di ntate ngue da hyoju", i enna hya. ⁵⁶ I ja rá ts'edi ra ndate ngue ho yø ja'i porque ja yø ts'oqui yø ja'i. 'Ne i mmanna ley ngue di njapra castigo ra ts'oqui. ⁵⁷ Pe janjuani dadi ja mammadi Oja ngue mi zä ma ec'ei ma Hmuhu Jesucristo, gue'a bi 'yøt'e ngue dá taphu ra ndate'a.

⁵⁸ Janangue nuya ma zi cu'ahu, ga duhu xandønho. 'Yo guí hehmu na ma nt'ec'eihu i ja. 'Yo guí säyahu ya, zant'a dami 'yørpahu rá 'befi ra Hmu. Ya guí pahmu ngue nuna rá 'befi ra Hmu dí ørpahu hinga särbutho dadi mpehmu.

16 ¹ Nu'a ra menyu ja ngue gui pethu para ngue gui unhnu ma cuhu rá m'mu'a n'nanni, dami 'yøthu tengutho ra hya dá xicä yø 'yec'ei rá m'mup'u ja ra häi Galacia. ² Nu'mø gá mpetihu'a ndomingo, n'na ndi ngu n'na ndi guí mpetihu, n'na ngu n'na yø 'yec'ei da hyaxi zi algo ra menyu ngue ra ofrenda para ngue da ma m'mets'i. Janangue

nu'mø dá magä p'u guí 'buhmu, hinga ja gui pethu ra menyu. Ya xqui 'uecju zihangu'a tengue xa nzut'a ni ts'edi xcá tahmu. ³ Nu'mø dá magä p'u, ya xqui huanhnu yø n'yohu ga et'a ngue da ma Jerusalén, di dá ra menyu. 'Ne ga unna carta da gats'i ngue dani dá. ⁴ A nu'mø da zä ngue 'nequi ga mma, 'da gdá megä'be'u yø n'yohu da ma p'uya.

⁵ Nu'mø dá nexä ua ngue gani mpagä p'u ja ra häi Macedonia, m'mefa p'uya ga thogui gani mpap'u Corinto guí 'buhmu. ⁶ Xamhmatho da zä ngue ga m'mucä p'u njammi pa. A nu'mø da zä, ja ga m'mup'u mente gä di thohyø se'ye. Ya da zä guí fäxcahu te ga honi ha gani mpa 'mø dá thogui. ⁷ Hindí nne ngue ga thotho 'mø dá map'u guí 'buhmu. Da ne Oja ngue da zä ga m'mucä p'u njammi pa. ⁸ Pe nuyá, dí nne ga m'mucua Efeso mente da zonna pa ngue ra ngo Pentecostés. ⁹ Porque nua Efeso säp'u ga mmangä xanho ra hya ua madague'a xangu to suqui.

¹⁰ Nu'mø bi map'u guí 'buhmu na ra Timoteo, dami 'yörpah masu, porque nuna xquet'a örpabi rá 'befi ra Hmu tengutho ra 'befi dí øt'ä.

¹¹ Nuna ra Timoteo, dami nu mansuhu na. A nu'mø bá pengui ngue da zocua dí 'bui, guá fäxhu'a te di zocua. Porque dí tømí ngue da zocua ha dí 'bui, da gue'u ma cuhu n'youi dí tømí ngue da zocua.

¹² A nuna ma cuhu ra Apolos, dá xicä na ngue 'da xtí mähä'u ma cuhu bi ma da nu'ahu. Pe himbi ne bi ma. A nuyá, xamhmatho da bongui ngue da map'u ya.

¹³ Dá 'yo ni 'yu te gui 'yøthu. Dami 'yøt'e ngue du ni nt'ec'eihu. Dami hyahu nzammui n'na ngu n'na. ¹⁴ Nu'a te gä i ja ngue gui 'yøthu, to bi zä ma ja'i, gä guí mahmu.

¹⁵ Ague ma zi cu'ahu, nu'mø rá müdi mambá hmanna hoga 'da'yo hya p'u ja ra häi Acaya guí 'buhmu, guí pahmu ngue nuna ra Estéfanos co gätho'u 'bup'u ja rá ngu na, guehya rá müditho bi 'yec'eí na ra hya na. 'Ne guehya janjuani ngue ho yø mmui ngue fäxyø cu ya. ¹⁶ Dí negä ya ngue nu'a te ra hya mmanya dí xi'ahu ya, dami 'yec'eihu. Da gue'u mi'da di mpefi ngue mmanna hya, 'ne da 'yøt'ahu ra nho na ra hya i mma, dami 'yec'eihu te mma.

¹⁷ Janjuani dadi johya ngue bi zocua ya ni mmenguhu ra Estéfanos, bá n'youi ra Fortunato, conna Acaico. Porque hinguí sä guí zenguagahu ngue yap'utho ni ngu. Pe ya bi zocua ya ma cuhu ngue bi zenguagui, entho gä søschu ua ngue gä zenguagahu. ¹⁸ Janjuani ngue di hacra ts'edi 'mø mi zøhø, tengutho gui ha'ahu ra ts'edi. Dami pahmu ngue nuya yø n'yohu njap'u ngue di hatra ts'edi yø ja'i, dami nu mansuhu ya.

¹⁹ Nuya yø 'yec'eí 'bui gä ra häi Asia, gä di zengua'ahu. Nuya di zengua'ahu, guehna ra Aquila 'nehra Priscila, da guehya yø ja'i di mpeti

p'ɥ ja yø ngu ya p'ɥya di zengua'ahɥ. Porque n'nat'a ma Hmu dí ɛc'ɛihɥ.

²⁰ I pen'nahɥ ra nzengua gätho ya ma cuhɥ 'bucua. Gätho ma zengua n'na ngu n'na'ahɥ.

²¹ Nugä drä Pablo dadi cuatä ma thuhɥ na ra carta ja ua ngue dadi zengua'ahɥ.

²² A nuyá, nu'mø toni ja'i ngue hindi ma'a ma Hmuhɥ Jesucristo, guehna ra ja'i da ma ra castigo na. Da ne'a ra Hmu ngue da ehɛ.

²³ Nu'a ma Hmuhɥ Jesucristo da ne ngue di jap'ahɥ. ²⁴ Nu to gätho di ɛc'ɛihɥ ra Jesucristo, dí pennbabi ra hya ngue dadi madi. Da ngut'atho.